




赵缺  
著

# 诗三百

无咎



“新国风”倡导者 赵缺

二十四年诗词精选

张贤亮、汪国真、文怀沙、高占祥  
庞中华、赵忠祥、周其凤、孔庆东

手书  
力荐



## 版权信息

书名:无咎诗三百

作者:赵缺

ISBN:9787508658612

中信出版集团制作发行

版权所有•侵权必究

## 序

余少年放荡，终日逍遥。既厌学于学堂，复读书于书肆。稍通经史，每夸国士之才；不获功名，仍执贩夫之业。视娼优之富贵，应有赧颜；抗隶卒之威严，或无惧色。时而呼啸于霓虹之下，暇则吟歌于草木之间。曳履徘徊，几经平仄；登车辗转，虚度炎凉。虽半世之遭逢，未尝如愿；惟多年之阅历，足以成诗。

诗者，感其遇而述其心，发乎情而施乎艺也。汉唐已远，夷夏将同。城市方兴，山林安在？神舟奔月，休言双桨之功；宝马追风，敢曰四蹄之力？嗟乎！鲲离北海，反变枯鱼；龙赴西洋，遂成妖兽。属文陋室，未必挥毫；谋食高楼，岂能弹剑？惟当抱赤子之精诚而继古，去腐儒之矫饰以趋新，咏眼前之气象而遣怀，录心上之波澜以明志。

呜呼！诗心易老，佛法难求。所知非知，不变惟变。星辰明灭，射已往之光芒；日月升沉，燃未来之灰烬。神驰天外，大地只如微尘；梦断江东，此身堪比何物？回声虚谷，散故我于十方；倒影长河，访佳人于千载。清风萧瑟，真幻俱空；黄叶飘零，古今同慨。英雄醉酒，化曹操之骷髅；儿女簪花，剩辛追之毛发。青蝇逐臭，彩蝶嗜香。哀哉哀哉，杳矣杳矣！雨冲云涧，昧因果于三生；浪涌沙滩，了沧桑于一瞥。

偶忆旧时之乐，竟牵此际之愁，乃知今夜之悲，将惹他年之笑。呕心深巷，谁复相轻；泣血荆山，何如自赏？辞章百炼，且登工匠之门；义理三思，未载圣王之道。率皆尧舜不闻之事，巢由不屑之情，周公不采之篇，孔子欲删之作。设流传于世界，即可诛之；须湮没于尘嚣，始无咎也。

江东布衣赵缺  
庚寅暮秋于杨思河畔

## 正体诗 五绝

唐婉

沈园惊一会，还念旧情无？  
满壁钗头凤，如何对后夫。

2004年3月8日

近视

飞花飞不远，瓣瓣落东篱。  
仰看天台侧，有人抛果皮。

2004年3月25日

唐寅

纵酒何妨醉，逢人只剩狂。  
可怜身死后，才得遇秋香。

2004年6月22日

## 灵犬

于小餐馆就餐，见一犬，问咬人否，主人答曰：

此犬通灵性，看家四五春。  
逢君自摇尾，只吠外乡人。

2004年12月20日

## 午后，于弄堂观二老翁下棋

半杯茶渐凉，一步棋高举。  
驻足两三人，敛眉终不语。

2005年3月3日

## 洪水

洪水神蛟力，粮仓硕鼠居。  
是猫都一样，天性爱偷鱼。

2005年12月29日

## 情人节

独坐西窗下，咖啡已半凉。  
平生甜蜜事，恰似口香糖。

2006年2月15日

## 北风

扬起雪三尺，掀开云万重。  
北风虽泼辣，犹可嫁青松。

2006年8月4日

## 闻山西黑窑童工事有感·民愤

民愤传千里，天雷降九州。  
今宵风雨乱，通缉一工头。

2007年6月19日

## 呆坐八章

### 其一

四壁遮双眼，孤灯照此身。  
心如空屋子，日久自生尘。

## 其二

衔木填沧海，平生未感天。  
愚公千万代，不及二神仙。

## 其三

名利充心际，文章出指尖。  
皆非身外物，恰似水中盐。

## 其四

欲开新世界，欲逐旧光阴。  
生命如枷锁，层层困住心。

## 其五

假使在洪荒，无盐犹美女。  
他年李杜诗，也似猿猴语。

## 其六

千江月一轮，一树花千朵。  
纵有那时她，已无当日我。

## 其七

尘土粘灯罩，光辉泛镜台。  
古今皆已往，昼夜复将来。



## 其八

回首终无路，栖身便是家。  
浮云千古外，化作一杯茶。

2011年4月1日

## 密码二章

### 其一

数字谁生日，拼音是小名。  
十年终不改，默默念卿卿。

### 其二

心中有何事？心上是何人？  
心似江南雪，消融在早春。

2011年8月3日

## 中秋无月有感

为有中秋月，平生未惜春。  
此时虽不见，应照远方人。

2011年9月12日

# 闲情三章

## 其一

故侣仍漂泊，思之每痛心。  
忽闻来日嫁，又觉意沉沉。

## 其二

走过千条路，归来一扇门。  
当时如嫁我，今日也离婚。

## 其三

君如河畔柳，我是海中船。  
不见常思念，见之惟怅然。

2012年1月27日

# 老街印象

雨点随风散，春花剩几枝？  
一条青石路，通向少年时。

2012年6月24日

# 故人

相聚惟三刻，重逢又一年。  
屏中人未散，仿佛在身边。

2015年4月11日

## 童年记忆十六章

### 一梦

壮岁春秋短，童年日月长。  
今宵归一梦，天地八平方。

### 屋内

旧衣床下烂，剩菜碗中消。  
入夜思驱鼠，逢春厌养猫。

### 屋外

水斗层层藓，煤炉袅袅烟。  
湿衣竿上舞，七彩蔽云天。

### 门前电视

门外声如沸，屏中泪自流。  
纵横长板凳，围坐看红楼。

### 早餐

热汤浇冷饭，米醋蘸油条。  
忽向邻家看，生煎香味飘。

### 上学途中

相逢皆不语，缓缓赴前程。  
谁驾单车过，回头唤女生。

### 回家路上

疾奔挥热汗，一任晚风凉。  
明日如生病，无须上学堂。

### 小解

临急奔何处，知羞且背光。  
阴沟容不下，斜挺射泥墙。

### 洗澡

膝前开洞穴，指上入泥沙。  
向晚盆中坐，毛巾舞浪花。

### 香烟牌子

武松拿一虎，吕布荡千军。  
不及李元霸，双锤八百斤。

### 读书

独坐群儿外，翻书历汉唐。  
每逢生僻字，随口读偏旁。

### 小妹

童谣何处起，跃跃橡皮筋。  
三五邻家女，随风曳彩裙。

### 大婶

忙里抛恩怨，闲来说短长。  
几番风雨后，分作两三帮。

### 磨刀老汉

一肩长板凳，一领旧棉袍。  
一路声声喝：削刀磨剪刀。

### 白日

白日墙边桶，清风窗下鞋。  
直行疑绝路，左拐见长街。

### 灯火

灯火新街道，尘烟老弄堂。  
一生终是客，四海尽他乡。

2015年4月23日

## 正体诗 七绝

### 咏虎

山林来去起风尘，百兽之王字号真。  
长啸也曾惊世界，终于背上坐财神。

2003年1月27日

### 姐己

千古兴亡在丈夫，佳人未必尽无辜。  
旧时闺阁贤良女，一入宫门竟化狐。

2003年2月10日

### 戏题春节联欢会

一岁飘零泪两行，且归寒舍伴爷娘。  
看完春节联欢会，始悟他人尽小康。

2003年2月12日

## 咏史五篇

### 厉王止谤

朝廷专利士农贫，止谤何曾了祸因。  
来世须为圣天子，防民之外更愚民。

2003年11月21日

### 郑伯克周

百战中原定是非，锋芒带血映余晖。  
老狐乱世先称霸，一箭居然灭虎威。

2003年11月21日

### 汉武帝尊儒

沙场白骨赫皇都，从此百家朝一夫。  
廷下诸生皆犬马，何须遗臭枉坑儒。

2003年11月21日

### 曹丕篡汉

三辞三让感苍穹，立德立言如立功。  
所谓主人皆傀儡，由来权相是英雄。

2003年11月24日

## 五胡乱华

马踏两京黎庶愁，和亲本是汉家谋。  
休言江北胡尘乱，肇事匈奴已姓刘。

2003年11月24日

## 游莫干山二篇

### 其一

九转青阶过竹林，扬头一啸有回音。  
眼前忽现蓝条幅：收礼还收脑白金。

### 其二

人到巅峰眼界宽，临风一任腿腰酸。  
阿姨家在山坡下，健步飞来售笋干。

2004年10月17日

## 过包公墓

画梁雕栋古林园，游客纷纷过墓前。  
盛世既逢三代表，有冤不必拜青天。

2004年11月5日



## 笑谈二篇

### 其一

海誓山盟久厌闻，拈花一笑掷风尘。  
阿奴也有真心话，只是说来难动人。

### 其二

相思相忆在深宵，相见终如万里遥。  
往事回头皆可笑，浮生到底是无聊。

2004年11月20日

## 戏题旧书本四篇

### 作文簿

时时让座与归钱，一个大娘扶九年。  
灵感偶来书壮志，老师批我太疯癫。

### 历史书

几度风雷战鬼神，巴黎气象总非春。  
自由平等皆空话，宪法依然爱富人。

### 政治书

浮华世界必沉沦，贫富不均天下嗔。  
牛乳宁随波浪去，终无一滴济穷人。

### 物理书

天生未可入其门，枉费青春枉费神。  
来日吾儿若相问，不知牛顿是何人。

2004年12月25日

### 暮归，见小区旁有老妇卖毛豆子

壳子青青豆子鲜，晚来犹坐小区边。  
先生莫虑人工费，老妇光阴不值钱。

2005年6月21日

### 新邻

阿叔单车锁二轮，阿婆阿嫂话防身。  
门窗日夜要关紧，隔壁搬来乡下人。

2005年7月4日

### 发廊女

独坐镜前描粉腮，灯昏不见故人来。  
万般生意皆如此，一店兴隆百店开。

2005年7月23日

## 良夜独行，于天桥见持花少年

月在西沉花在凋，谁家小子立中宵。  
当年我亦痴痴等，误认天桥是鹊桥。

2005年8月12日

## 同学聚会二篇

### 女生

一树秋风落叶青，满园灯火似恒星。  
欲将十载平平事，说与斯人慢慢听。

### 出门

百尺青阶车一排，闲闲负手立尘埃。  
闻知更有贫寒者，只是今宵不过来。

2005年9月17日

## 范文程

犬马生涯亦费神，但求天下尽胡尘。  
已无毛发如先祖，或有功名盖古人。

2005年10月11日

## 施琅

腥风有力恨无涯，万里封侯且忘家。  
从此岛夷皆左衽，中华何处是中华。

2005年10月11日

## 汪兆铭

风霜尽改少年头，四野哀鸿一夜忧。  
百胜皇军终败退，先生因此逆潮流。

2005年10月11日

## 河边老翁

几回扶手慢移挪，无尽斜阳看逝波。

今晚老妻终不在，空推轮椅唱山歌。

2005年11月21日

## 外滩拍照二章

### 其一

此日西风漫道途，悠然负手望明珠。  
白光一闪回头问，留得残春背影无？

### 其二

江风来去送秋波，江畔人家剩几何？  
冷看前方终不笑，心知一笑皱纹多。

2005年12月20日

## 陆丞相

辗转三年才气穷，厓山一跃汉家终。  
人间谁笑迂夫子，未必就封安乐公。

2005年12月23日

## 袁督师

天地胸怀鱼肉身，千刀有限痛无垠。  
京师愤愤毗牙者，他日如何作顺民？

2005年12月23日

## 张苍水

江东百战抗天时，生亦悲凉死亦痴。  
武穆除名秦桧立，英雄何处望新祠？

2005年12月23日

## 公司长假前打扫卫生，见窗台水仙有感

青青长叶欲开花，悄立窗台对晚霞。  
知我归来香已散，只今何不捧回家？

2006年1月24日

## 龙华四章

### 其一

龙华寺外好游春，袅袅青烟看不真。  
一缕幽香谁把握，世尊原是卖花人。

## 其二

小摊雕像亦传神，相对无缘且转身。  
白玉观音容易碎，不如人海看佳人。

## 其三

娉婷来去只摩肩，或许前生共采莲。  
他日我于山水外，一声口号上西天。

## 其四

半轮明月上天衢，一路行来访旧居。  
恰是大年初九夜，谁家门外挂鲢鱼。

2006年2月7日

## 情事二章

### 其一

十四年来世界殊，偶然春梦亦模糊。  
相逢一笑仍追问：到底曾经爱我无？

### 其二

中年仍似少年贫，敢怨佳人忘宿因？  
一语传来心忽痛：当天汝系白围巾。

2006年2月14日

## 春日晨起

晓日初开天地宽，棉衣褪去赏轻寒。  
春光尽在离离草，何必阳台种牡丹。

2006年2月24日

## 弄堂六章

### 弄堂

地铁公交通四方，繁华深处聚民房。  
此间最是黄金地，十面大楼遮太阳。

### 租金

阁楼来去总弯身，一月租金半月薪。  
如此住房如此价，沪人都是有钱人。

### 早饭

白雾腾腾赤豆汤，荷包蛋里色金黄。  
忽闻刷刷窗前起，老妪悠然倒夜香。



## 傍晚

肉丝酸辣带鱼腥，墙角横斜啤酒瓶。  
闲话有时难解闷，一家吵架几家听。

## 纳凉

小径弯弯夜幕低，空调扇似暖风机。  
门前除却光膀汉，老少人人穿睡衣。

## 拆迁

传言入耳各悲欢，从此无心上下班。  
来日谁家豪宅立，主人迁向小昆山。

2006年5月30日

## 题某某婚纱照

含情含笑亦含羞，长发轻纱似水柔。  
携手将随人远去，可曾因我一回眸？

2006年9月4日

## 好婆五章

### 其一

算尽花销更不眠，起来仍是艳阳天。  
儿时记忆今犹在，物价飞升四九年。

## 其二

菜摊还价久徘徊，你省租金我省财。  
何处一声城管到，满街惊看小车来。

## 其三

头痛无非血压高，邻街医院路遥遥。  
寻常小病都能忍，大病来时命一条。

## 其四

三代同堂屋一间，小儿婚事在明年。  
偶逢牌友谈家计，传说今秋要动迁。

## 其五

一夜风光麻将台，小钱花了大钱来。  
买斤猪肉烧三顿，想象农民已发财。

2007年8月14日

## 正体诗 五律

### 算命

迎面何人也？相看且定睛。  
前途谓能卜，往事料难明。  
同是天涯客，皆非世上英。  
凭君两三语，慰我一时情。

2003年4月7日

### 推销员

领带西装正，摩丝短发匀。  
喜忧皆是笑，过往尽为宾。  
苦挣三餐费，闲谈百万薪。  
深宵思故里，不许此身贫。

2003年4月8日

### 外滩

江水奔何处，江风伴此身。  
浮沉百年事，来去五洲人。  
洋屋沿街立，华楼隔岸伸。  
儿时谁共我，遥指万吨轮。

2003年7月3日

## 酷暑

广厦凉如水，长街热欲焚。  
公门说山海，菜市煮腥羶。  
且避垂涎狗，难驱嗜血蚊。  
偶然天震动，雨露两三分。

2003年8月5日

## 重读《出师表》，乃得一律

出师何日返，洒泪此情真。  
大业呼先帝，忠心看老臣。  
愿君常拱手，居上且修身。  
一一贤良列，其余或小人。

2003年8月18日

## 卖唱女童

咿呀穿闹市，何处觅知音？  
脂粉遮羞色，霓虹乱素心。  
几回无赏赐，依旧独歌吟。  
商宦千金女，今宵亦学琴。

2003年9月1日

## 一代人

少年听国策，热血赴农庄。  
竭力开荒野，充饥叹杂粮。  
村姑非伴侣，队长即爹娘。  
私事皆公事，他乡是故乡。  
忽然逢雨露，从此免风霜。  
往日愁何在？归途梦亦香。  
车行千里路，家有一间房。  
桌下移方凳，墙边设窄床。  
谋生待分配，失学少专长。  
但得三餐饱，何妨尽日忙。  
娶妻甘举债，生子乐倾囊。  
劳碌居城市，温馨在弄堂。

衡门会亲友，盛世羨官商。  
未敢求先富，犹能盼小康。  
我心虽自足，天意竟无常。  
旧厂终关闭，前程遂渺茫。  
也知身半老，惟剩泪双行。  
应聘落人后，摆摊蹲路旁。  
奔逃须迅速，来去莫惊慌。  
暮晚霞光好，且歌红太阳。

2003年9月4日

## 进口浴缸

陶瓷舶来品，万里沐风尘。  
未蓄华清水，先邀富贵人。  
惊他一缸价，是我十年薪。  
我亦非贫者，淮河有难民。

2003年9月24日

## 某“乡下人”

华灯常刺眼，陋室且安身。

十载城中客，百年乡下人。  
生涯如往日，归路在新春。  
翘首家园近，西装莫染尘。

2003年10月16日

## 新官上任

沃土千秋在，往来人不同。  
几番开大会，依旧立新风。  
伐树仍栽树，完工复动工。  
民夫皆饱暖，埋首力无穷。

2003年10月21日

## 某中学生

兄弟皆如匪，爷娘本是官。  
乃知称霸易，何惧读书难？  
义气开帮派，忠心入党团。  
更凭身手好，应试做公安。

○兄弟：指“义兄”、“义弟”。

2003年10月30日

## 素食者说

众生承一脉，迷失在红尘。  
共处成冤孽，相残丧本真。  
千刀皆彻骨，五味只沾唇。  
但有慈悲意，应怜苦痛身。  
我心常自在，佛法更无伦。  
智者参因果，凡夫惧鬼神。  
恃强终放肆，好杀必沉沦。  
此日能屠狗，他年或食人。

2003年11月19日

## 某发屋学徒

大市沿街问，承蒙小店收。  
千丝缠日夜，十指浸春秋。  
数载无经验，何时得报酬？  
年终生意好，莫忆老山沟。

2003年12月6日

## 求职



匆匆两三月，奔走总无缘。  
体壮堪熬夜，家贫怯过年。  
临屏传简历，俯案待回笺。  
电话忽然响，仍招销售员。

2003年12月18日

## 乱世

乱世农家子，长征解倒悬。  
纵横千尺浪，谈笑一支烟。  
热血冲神鬼，雄心照海天。  
争知百年后，头像饰金钱。

2003年12月26日

## 猴王

神力惊天地，威名赫古今。  
一朝归正道，万事拜观音。  
老子栏中畜，如来顶上禽。  
悠哉取经路，只灭旧时心。

2004年1月20日

## 某医生

白褂无尘垢，清茶任暖凉。  
侧身聊问病，出手漫开方。  
岂曰千金贵，谁嫌一命长。  
谋财何足耻，举国尽从商。

2004年1月17日

## 世界

谨以此诗赠与那些不能出生的宝宝。

世界真喧闹，昏昏好睡眠。  
虽然很温暖，不是太安全。  
愿你带着梦，随风飞上天。  
天堂在哪里，相隔几光年？

2004年1月30日

## 淮海路

百年桐叶落，十里店门开。  
宝马频驰骋，单车禁往来。

有人携美色，几处掷雄财。  
小妹常闲逛，归家夜托腮。

2004年2月6日

## 为妻拉皮条者

敛眉蹲屋外，鼓舌绕街头。  
有客千般忍，无钱万事休。  
自夸将致富，谁谓不知羞。  
来日佳人老，归乡盖小楼。

2004年2月17日

## 某官

闹市呼风雨，穷乡问暖寒。  
登台千古句，赴宴一杯干。  
姊妹兴商业，儿孙入政坛。  
此身堪铁证，谁谓小康难。

2004年3月3日

## 地铁卖报人

步缓形骸瘦，肥衣捂报囊。  
侧身翻铁栅，混迹入车厢。  
切切迎头问，欣欣探手忙。  
小康真不远，时在版中央。

2004年3月11日

## 归山

闻说尘嚣外，招商治小山。  
忽然牵梦想，或者任痴顽。  
惟我才将去，有人先已还。  
传云水和电，事事要公关。

2004年3月12日

## 某机关公务员

茶凉茶复暖，来电且唯唯。  
办事仍须我，迁官又是谁。  
闲聊双眼闭，长叹此身卑。  
忽笑砖棚里，有人常断炊。

○ 砖棚：或应名之曰“砖庐”，城市之违章建筑也，外来贫者或居之，甚陋。

2004年3月17日

## 被拐妇女之获救返乡

久凋花作土，春色忽飞扬。  
泯灭三秋梦，消磨几处伤。  
山中有儿女，山外有爷娘。  
倚坐车窗下，木然归故乡。

2004年3月22日

## 某交警

风吹尘雾起，举首正形骸。  
尽惹街头怨，堪交月底差。  
执法应严肃，看人休错乖。  
何来逆行者，敬礼对车牌。

○折腰体。

2004年4月24日

## 网络扫黄

文明新建设，举国大声张。  
网页搜查紧，论坛监控忙。  
有才封耳目，何计浣膏肓？  
且剩无聊客，深宵入发廊。

2004年8月18日

## 街道选举

大婶何呼我，呼声动四邻。  
迎头递钢笔，谓我是公民。  
投票即参政，划钩如献身。  
名单聊一瞥，个个陌生人。

2004年10月10日

## 上海某人

车下西装皱，风中领带长。  
久无安定业，幸有动迁房。  
四望皆人海，千军入我乡。  
归家教稚子，勤学竞留洋。

2004年10月13日

## 屡次遭窃，戏作与偷儿问答

同挤大巴士，同蹲小面摊。  
缘何常探手，累我不加餐。  
别墅皆防盗，华楼尽保安。  
砖棚若遭窃，衣食更为难。

2004年12月23日

## 外来妇之儿病

捂被求虚汗，糊窗阻朔风。  
平明头欲白，彻夜眼通红。  
忍听儿呼痛，信知夫作聋。  
良医何太远，只在大楼中。

2005年1月17日

## 公交车上，见一妇教子

遥望车行缓，无须守站边。  
迎身休落后，算步要超前。  
此去家中远，从来路上颠。  
不能争一座，何事得争先？

2005年1月25日

## 夜饮醉归

起座微风荡，朱颜信手遮。  
三年常抑郁，一醉偶豪奢。  
心火狂如马，街灯蜿似蛇。  
回眸春色远，守候末班车。

2005年3月1日

## 药交会见人造处女膜有感

万物皆人造，何妨假作真。  
新欢仍见血，旧爱不留痕。  
常有三生会，终无百日恩。  
当年谁似我，牵手最销魂。

○《中华正韵》。

2005年3月16日

公司附近多推童车之卖黄碟妇，偶为其儿赋  
得一律



贫子当家早，童车来远方。  
昏昏眠闹市，静静沐斜阳。  
张口如呼客，摇头或见娘。  
阿哥将九岁，街尾自开张。

2005年5月25日

## 卖唱盲人

棉衣无冷暖，木杖且盘旋。  
嘶哑歌三阙，叮当拜一钱。  
小心穿大路，白眼向青天。  
不见红尘事，见之皆可怜。

2005年6月6日

## 包装

公司保健品业务不佳，承某经销商教，乃录其言。

何必说真效，知君才入行。  
灵丹凭草制，礼盒要金镶。  
质美无人问，名虚万里扬。  
而今天下事，惟看一包装。

2005年6月10日

## 闻黑龙江百名学童水灾遇难有感

青青山下草，旦暮有悲欢。  
生命常如此，何时不偶然。  
凄风归一炬，笑浪逝千川。  
今夜银河冷，飘浮月亮船。

○《中华正韵》。

2005年6月16日

## 送水工

横挂六桶水，单车迎太阳。  
辛劳才半日，酬报已三张。  
难解心中渴，仍求眼下忙。  
前途风景好，足以傲同乡。

2005年6月25日

## 协警

暑气三千灶，车尘一片风。  
小旗挥赤日，尖哨彻苍穹。  
岂是公门下，无非大路中。  
沪人常不理，只好吓民工。

2005年8月26日

## 夜过河畔见拆迁废屋有民工住宿

何不露天宿，迩来天气秋。  
断梁应入眼，败瓦尚遮头。  
夜半人初定，风多蝉亦休。  
川杨河下水，逐我梦漂流。

2005年9月8日

## 秋游雁荡山，遇台风而去

白瀑神龙噫，青峰秀女庞。  
匆匆辞远客，隐隐在车窗。  
也爱山珍好，终无膂力扛。  
台风应有意，逐我到申江。

○终无膂力扛：屡入特产店，徘徊良久，主人问之，唯称“行李多，拿不动”。

2005年9月11日

## 助动三轮车夫

何须牛马力，一路散轻烟。  
载客稍无忌，回乡应有钱。  
落叶三秋地，浮云万里天。  
徜徉大都会，只是在边缘。

○折腰体。

2005年9月13日

## 打工者之车到上海

久坐终无寐，繁华在梦乡。  
阴云遮大野，污水绕平房。  
一夜家千里，三年客四方。  
火车能到处，未必是天堂。

2005年9月27日

## 上海某青年

金表能防水，皮靴不染尘。  
往来谈意气，歌舞展精神。  
待业心无虑，留洋梦似真。  
娶妻生子后，二老养三人。

2005年11月11日

## 城郊翁姬

不见阳光好，犹铺棉被胎。  
老翁才戒赌，小院遂生苔。  
一女多忙碌，三年数往来。  
门前长板凳，倚背望云开。

2005年12月1日

## 楼窗清洁工之答妻

一绳悬瘦影，百丈浣纤尘。  
远去华楼亮，归来陋室春。  
日间精力尽，月末报酬真。  
何况安全好，三年未死人。

2005年12月2日

## 某沪籍女工

贫贱心多虑，辛劳背已弯。  
乍闻淘汰制，如遇死生关。  
厂主犹和善，村姑自野蛮。  
月薪唯六百，何况肯加班。

2005年12月13日

## 故人来访

见面呼稀客，谈心也费猜。  
前年售安利，去岁贷钱财。  
无事不相问，有求方自来。  
儿时谁与我，阶下并扶腮。

2006年2月21日

## 夜过卢湾区某街道

只影街灯下，弥茫幻复真。  
琴声楼上月，花气路边尘。  
车去仍挥手，风来遂转身。  
流光如烈焰，融化夜归人。

2006年2月28日

## 结拜

举茶权作酒，插木以为香。  
叩首成兄弟，扪心誓死亡。  
侠义皆童话，传奇只梦乡。  
庸庸偶相会，片语笑荒唐。

○折腰体。

2006年3月2日

## 河浜清洁工

船过垂杨里，搜捞汗一身。  
风光曾纳垢，眉目且沾尘。  
水底鱼行乐，岸边谁写真？  
撑竿桥下去，不是画中人。

2006年3月9日

闻昔日保险公司某女强人近况，乃为之赋

振臂终无力，悠然坐讲堂。  
几回争上下，十载历炎凉。  
对镜休言老，逢人且说忙。  
归来春色远，满柜旧时装。

2006年3月15日

## 闻某工友求侣，乃为之赋

聚散终无寐，江南夜亦凉。  
本来皆异客，最好是同乡。  
秋叶随时落，春花到处香。  
去年深圳侣，枉自见爷娘。

2006年3月20日

## 某公司前台女职员

坐看人来去，生涯一线忙。  
偷闲施粉黛，逐日变衣裳。  
起座应含笑，下班仍补妆。  
可怜巴士站，不遇有钱郎。

2006年3月29日



## 与孟尼通话有感

与我儿孟尼通话，问曰：“闻汝近来每于深夜啼闹，汝三岁矣，何以仍似断乳之婴儿？”答曰：“想爸爸了。”闻之无语，遂作一律。

有妻非一路，有子见之难。  
何乃啼无止，居然语甚酸。  
当真应泪下，是假也心安。  
巧舌常如此，他年好做官。

2006年12月

## 红学

一梦千行泪，佳人去复来。  
抒情皆拍案，解密各登台。  
霜雪生涯困，风光死后哀。  
十年修巨著，万世养庸才。

2007年1月

## 夜市

城市听迷醉，钢琴或古琴。  
馨香通幻境，霉烂在余音。

去处忽遗忘，归途暂找寻。  
灯光如死水，沉淀夜之心。

2007年5月6日

## 江边码头

几度船声杳，依然侧耳听。  
烟花除夕夜，风雨候车亭。  
暮色沉于水，春光散作星。  
繁华容不下，往日一蜻蜓。

2007年6月8日

## 老宅

老街应在此，伫立复徘徊。  
南北高楼立，东西大路开。  
废墟终不见，旧址也难猜。  
且坐浮云下，依然明月来。

2007年7月

## 某市场总监

团队如军队，堂前振臂呼。  
偶然吟白字，依旧画蓝图。  
千里从商战，九州皆战俘。  
年终分巨赏，勉作一房奴。

○“战”字重，不改。

2007年8月13日

## 拾荒女人幼子

得意砖棚下，何须扰阿娘。  
撕开黄纸板，剪作小机枪。  
突突低声叫，昂昂怒目张。  
偶逢楼上子，瞄远对胸膛。

2007年8月21日

## 午饭时，于老街见修鞋匠

斜举新来货，殷勤对日光。  
钢针穿韧线，板凳靠泥墙。  
且待鞋将好，休怜饭欲凉。  
久经皮革味，世上已无香。

2007年8月23日

于盗版书摊见淫书《民工艳遇》，有褐衣者  
翻阅良久

久读街灯暗，津津且忘家。  
奇文翻似水，小字乱如麻。  
饱暖奔天下，风光隔海涯。  
今宵疲惫后，得否梦桃花？

2007年9月4日

某“园丁”于教师节之后有感，乃录其言

校园耕一载，佳节赏金风。  
有父能知礼，斯儿始用功。  
寒门多蠢物，望族出神童。  
失学农家子，他年亦苦工。

2007年9月12日

寓京偶感

寒室听花落，华筵怯酒香。

有人相问好，无事自奔忙。  
兴至空谈热，醉来吴语狂。  
偶逢江北客，聊且认同乡。

2008年9月25日

## 致羽田孜先生

千载辞秦阙，三山作故乡。  
冰心融入海，铁骨炼成钢。  
破浪穿今古，迎风任暖凉。  
英雄虽有种，天地本无疆。

2009年12月18日

## 助动三轮车夫（二）

风雨休闲帽，泥尘解放鞋。  
驱驰三里路，割据一条街。  
偶尔穿花径，悠然立石阶。  
官家如不管，上下即和谐。

2011年4月3日

## 于车中见散发楼盘宣传页者，乃为之赋

今日无风雨，前途任短长。  
追随车左右，奔走路中央。  
寥落家千里，繁华纸一张。  
也知忙半世，不得此间房。

2011年6月28日

## 戏作三江二十四韵

解语花终落，能言石自彫。  
情怀金闪烁，文字玉琤琮。  
求富不弹铗，安贫聊倚窗。  
仍思去稂莠，复欲采兰茝。  
铜鞮封三尺，芒屨任几双。  
一时夸俊杰，何处振家邦？  
海上风常变，都中音亦邛。  
华城皆扰扰，幽谷或涇涇。  
低唱犹南乐，空谈渐北腔。  
有闲磨铁砚，无意看银缸。  
飘雪侵髭鬓，流光映脸庞。  
严冬听雀噪，静夜察人跫。

曲径通平野，长河断古缸。  
五经单手托，九鼎两肩扛。  
山外寻飞凤，天涯遇瘕彪。  
老儿偏放肆，竖子更愚憊。  
称霸居枯井，争王到大江。  
汝皮虽似盾，我笔恰如鎗。  
梦里曾擒虎，醒来堪馭駟。  
气冲云漠漠，声遏水淙淙。  
叱咤谁迎战，从容乃受降。  
抚心消块垒，举首晒旌幢。  
忽尔见轻霭，依然闻怒泷。  
且斟茶半盏，权当酒千缸。

2012年1月14日

## 闻昔日某洗头女沦为娼妓，乃为之赋

红颜曾自重，素手复谁怜？  
逐梦三千里，辞家十二年。  
有情终变化，无力再疯癫。  
未老须拚命，将来不值钱。

2012年2月29日

## 清明扫墓，见堂弟程诚遗像有感

碑上容颜旧，凝眸复默哀。  
当年如不死，今日或同来。  
未了人间事，且成泉下材。  
此时应看我，为汝拭尘埃。

2012年4月

## 同学聚会归来有感

世事千条线，人生一个圈。  
往来成道路，聚散忆根源。  
已识容颜改，仍听笑语喧。  
今宵皆尽兴，再会也无言。

2013年2月27日

## 老街卖饼女郎

三年行六里，来去亦风尘。  
面粉沾双鬓，油烟沁半身。  
推车仍入夜，举步未逢春。  
在此难开店，归乡难嫁人。



2013年8月3日

## 于三十八岁生日有感

梦里身三变，醒来腰一伸。  
起居无大事，奔走亦闲人。  
白日心中火，青山脚下尘。  
百花开复谢，不朽是残春。

2014年6月1日

## 乾坤

乾坤破一丸，桃李开千朵。  
造下最初因，引来无尽果。  
往复竟何之，死生皆不可。  
此心非此心，变幻于枷锁。

○折腰体。

2015年2月9日

## 千江

千江无止水，一梦是流星。  
往者仍垂范，求之已变形。  
光阴燃血肉，天地汇魂灵。  
跃跃于枷锁，蒙蒙在障屏。  
养花嫌粪土，佐酒拒荤腥。  
冬雪沟中化，春云山外停。  
忽逢桃李艳，遂忘柏松青。  
如此愁将散，缘何思未宁。  
佳人作娼妓，名士若优伶。  
成见皆真理，藏书或伪经。  
斩奸须斧钺，济困有朝廷。  
倦鸟辞南浦，枯鱼怅北溟。  
泪多非雨露，声大岂雷霆。  
我欲横眉啸，谁能侧耳听。  
生涯虽过百，死后也归零。  
来世当披甲，终身不识丁。

2015年2月25日

于闹市见一人拣弃物而食之，乃为之赋

既见汤中粉，何辞碗上尘？  
发长堪掩面，腹饱即翻身。

瘦影安于夜，欢声闹作春。  
复拖三色袋，一去不求人。

○三色袋：指红白蓝三色编织袋。

2015年3月6日

## 远行

远行终困顿，久坐亦辛劳。  
天色一时改，我心何处逃。  
八方灯似箭，万里月如刀。  
世事联丝网，人情铸铁牢。  
片云皆雨露，滴水岂波涛。  
抱璞璞将碎，移山山更高。  
疏狂焚大雅，贫贱唾离骚。  
不死非诗圣，来生做土豪。

2015年3月25日

## 于长青路见一老丐，乃为之赋

屈膝繁华远，垂头天地昏。  
已难行闹市，岂敢叩朱门。

老病身无用，飘零气尚存。  
不甘求一死，不忍累儿孙。

2015年3月28日

## 咏马桶刷子

壁角憎含臭，生涯欲抱香。  
去污何日尽，沾水立时忙。  
怒发冲三寸，微躯转四方。  
岂知天下秽，多在世人肠。

2015年4月2日

## 无为

无为终寂寞，有用遂贪嗔。  
各辟云间路，以招天下人。  
圣婴将出世，处子岂怀春。  
片影曾交媾，孤阴乃妊娠。  
也甘扛木架，或欲掌金轮。  
勇敢须流血，慈悲但鼓唇。  
独尊滋草芥，普度涌烟尘。

既曰言非妄，应知法可遵。  
一时皆外道，千载即真神。  
宝典长生术，光环不朽身。  
愚民堪烈士，大盗竟忠臣。  
造化唯奴隶，升迁只缙绅。  
听之夸伏虎，任尔斥悬鹑。  
击壤腰先折，观星手莫伸。  
乐园仍幻灭，苦海永沉沦。  
历史难相信，今宵且自珍。

2015年4月5日

## 于三十九岁生日有感二章

### 其一

世相迷糊看，天心反复猜。  
尘烟今古事，灰烬栋梁材。  
破茧蚕何在，含苞花未开。  
乾坤皆老朽，造化是婴孩。

### 其二

我来应似火，我去也如风。  
倏尔光辉灭，依然印象空。

飞尘青嶂外，流水白云中。  
从此归沧海，随之现彩虹。

2015年6月1日

## 正体诗 七律

### 野草

春光莫问几时休，看惯名花看惯愁。  
生死焉能埋石下，枯荣不肯立墙头。  
粘天气象程程远，遍野情怀寸寸柔。  
纵使寒风吹梦断，一逢星火亮神州。

2002年4月19日

### 杂感

无肉无鱼亦饱餐，无琴无剑指空弹。  
眼高自可常翻白，头大从来不戴冠。  
时论到喉终一咳，新闻入耳便连鼾。  
悠然也欲山中老，只是今生债未完。

2002年12月9日

### 杂感（二）

谋生未必怕奔波，一路风光到大河。  
寥落乡村仍似画，饥劳岁月岂无歌。  
孔丘须向孔方拜，处女争如处长多。  
天上神仙终不见，且于尘世看妖魔。

2003年3月14日

## 项羽

率性生来自不臣，举兵难免弑王孙。  
纵横万里皆灰烬，睥睨群雄尽犬豚。  
但以恩威分赤县，岂因成败悔鸿门。  
回头也叹苍生苦，一死乌江断祸根。

2003年9月2日

## 春日赴人才市场

遥遥红日渐中天，收拾仪容小镜前。  
一路春风愁万缕，两排单位土三千。  
曾经事业何堪问，所望薪金未敢言。  
忽有少年呈学历，只求工作不求钱。

○《中华正韵》。



2004年3月1日

## 速递误时者说

笑迎呵斥乞包涵，怜我须供上学男。  
午后腿腰偏易痛，城中街巷未全谙。  
单车无力争先后，大路留神辨北南。  
只羨同人开助动，月薪能挣一千三。

2004年4月26日

## 老工人

断垣秋雨废车床，惊觉浮生梦里忙。  
但得安心谋饱暖，不妨埋首任炎凉。  
十年改制千行泪，半老归家两鬓霜。  
惟羨邻翁工厂好，夷人买去有赔偿。

2004年9月15日

## 纵怀

放纵襟怀呼吸间，心魔瞬息九光年。

长空吐刺星横扫，大地翻身我倒悬。  
久戒三荤屠肆侧，何庸一拜佛龕前。  
来生应入修罗道，奋杵荡平天外天。

2004年10月20日

## 屡闻矿难有感

薄奠权浇酒一觞，迩来此事渐寻常。  
欲争抚恤亲人闹，仍赴阴森工友忙。  
客里谋生原有梦，田间困死更无偿。  
拼将十万平民血，赢得千夫奔小康。

2004年12月17日

## 闻前女友欲赴倭国有感

当年挽臂指东洋，太息深仇怒发扬。  
痛斥如何参鬼魅，豪言终究会刀枪。  
赤心人变淘金客，白眼处成驰志乡。  
此夜料知分手地，沙滩依旧海风凉。

2005年1月10日

## 自嘲

那日朱楼梦雪芹，以为才笔系千钧。  
固非王霸重瞳相，信是春秋独角麟。  
百炼文章谋饱暖，十年滋味剩酸辛。  
而今只爱欧亨利，尽写华都众草民。

2005年1月13日

## 咏鸡

居有藩篱食有糠，羽毛从此莫伸张。  
但凭尖嘴驱同类，最爱高声颂太阳。  
新友结交猪鲁鲁，宿仇化解狗汪汪。  
九阶之下昂然立，一旦升天即凤凰。

2005年2月9日

## 论诗

百变风光不老天，街灯未必照名园。  
冢中或见衣冠在，路上岂闻车马喧。  
泰岳本非山首领，重洋尽是水根源。  
生涯随处皆诗句，何苦寒窗效雅言。

2005年2月16日

## 暮归，与旧书摊主闲谈

十载变迁茶一壶，摊前人迹更萧疏。  
独支棚伞风霜下，斜倚路灯星月初。  
女子消闲惟赌馆，男儿寻乐有娼庐。  
如君好学诚无几，亦买街头盗版书。

2005年4月15日

## 过纪念堂

庭殿森森喇叭鸣，三千游客肃然行。  
缅怀莫问绢花旧，留念何妨纸册轻。  
灯下容颜犹万岁，人间步伐自无情。  
后门叫卖像章者，或是当年红卫兵。

2005年4月26日

## 过南禅寺，观古代女尸偶得

一线流光百事非，喧声消寂鼓声微。

骷髅且向人间笑，魂魄应于月下归。  
如此女儿梳秀发，忽然少妇敛娥眉。  
小楼春梦何堪醒，三五苍蝇棺外飞。

○《中华正韵》。

2005年5月26日

## 于二十九岁生日有感

春梦醒时天色蓝，流光如水逝千帆。  
床头已撤伊人照，柜底空存故友函。  
未必生来堪落寞，何妨远去自呢喃。  
长街一串当年我，红领巾和白衬衫。

2005年6月1日

## 步行

天色朦胧月影斜，转身徒步到长街。  
腰间束紧宽松带，脚底磨穿解放鞋。  
一路走来迎赤日，有时累了坐青阶。  
扪心失笑浮尘远，我与轻车自不谐。

2005年6月20日

## 无题

十载匆匆万事轻，流光何处照生平。  
少年聚散谁无恨，壮岁浮沉自有情。  
欲写文章犹胆怯，偶闻消息亦心惊。  
他时人海如相遇，互指娇儿问小名。

2005年8月10日

## 某打工者遭“仙人跳”骗财，邻人劝之

独在他乡要守斋，可怜妻子盼钱财。  
每因小利居人下，岂有鲜花向汝开。  
留此一身堪卖力，从今百忍自消灾。  
申张徒惹房东怒，谁见官兵破案来。

2005年11月3日

## 次韵韩济中大夫咏河南艾滋病村

如此奇灾竟满门，满门哀恸更连村。  
一升血换炊烟热，几度风来烛火昏。  
剩有孤儿缠疫鬼，稍无杯酒祭亡魂。  
休言盛世得微恙，已见大人高座论。

2005年11月15日

## 强制拆迁

浩荡白盔驱小村，铁锤敲入卷帘门。  
挑开沉重花棉被，砸破愚顽黑瓦盆。  
故里他年将茂盛，近郊何处不生存。  
和风扬起红条幅，又向迁民话感恩。

2005年12月16日

## 团圆

偶问门卫回乡过春节否，答曰：

辗转生涯到此间，贫家何必话团圆。  
职低怯问加班费，路远堪逃压岁钱。  
梦里爷娘皆白发，别时兄弟是青年。  
忽闻大侄将投我，来日蜗居不独眠。

2006年1月17日

## 国朝人物杂咏之邓稼先

万里归来献此身，波涛看尽看沙尘。  
十年辛苦抛家室，两度轰鸣震鬼神。  
蜡炬平生惟照夜，梅花到死不争春。  
多情最是唐天子，海上欲招杨美人。

2006年1月17日

## 国朝人物杂咏之刘文学

贫者光荣富者奸，寒宵一喝舞双拳。  
知其罪恶如当日，看我英雄出少年。  
孤冢峨峨荒草地，群山漠漠紫云天。  
小儿不解从前事，笑问红椒值几钱。

2006年1月17日

## 国朝人物杂咏之张明春

官商岂肯爱农夫，毕竟农夫亦暴徒。  
一霎怒雷堪壮烈，千金遗债未消除。  
来年或遇康乾世，此夜谁翻马列书。  
秦帝已收天下刃，揭竿仍可捣皇都。

○《中华正韵》。



2006年1月18日

## 书生霸王歌

万里风云在醉乡，无裘无马也轻狂。  
辟阳早已污高帝，杜默何庸哭霸王。  
自古诸生多沆瀣，他年一死有文章。  
天时恰好诗家幸，不必梦中归汉唐。

2006年2月10日

## 日记

旧梦藏于故纸堆，宛然抬手誓冬雷。  
流星过眼仍堪忆，冷月当头不可追。  
费我文章千百阕，吟她名字两三回。  
重翻怕惹妻儿笑，十载深情付死灰。

○《中华正韵》。

2006年2月13日

## 春秋五霸之宋襄公

尘烟漫处拭青铜，慷慨何时建武功。  
放眼不知新世界，抚膺常忆旧英雄。  
立言未必三王下，备位居然五霸中。  
千古痴心堪一恸，殷墟犹照夕阳红。

2006年3月10日

## 小职员

木然微笑亦如春，事事无聊且认真。  
小半精神谋客户，七分心力应同人。  
何当去职重昂首，几欲加薪未启唇。  
向晚终于松领带，长街依旧逐车尘。

2006年3月24日

## 步韵六答陈祖荫

成者王侯败者僧，壮心磨灭骨棱棱。  
人如老木依乡土，梦是轻舟放缆绳。  
任彼铄金千百客，随君锻铁两三朋。  
闲来一并京华醉，不必江南访子陵。

2006年3月30日

## 一夜

一夜茫然几处灯，巫山杳杳乱云横。  
折花应惹春风怨，抱柱且听流水声。  
当我行时无后路，与君归处即前程。  
何须怅望残星灭，此日不妨才五更。

2006年4月10日

## 末代皇帝

儒者应科农者耕，九畿胡马漫纵横。  
象舆可否终南面，藤甲安能复北征？  
夷狄有君夸盛世，文明无力守长城。  
可怜孤岛衣冠在，正朔何须问死生。

2006年3月31日

## 明绍宗

万里胡尘逼海滨，此心将碎此身勤。  
中兴辗转龙登位，北伐飘零雁失群。  
半世何如汉宣帝，九州谁是霍将军？  
波涛逝尽英雄在，坐守天涯一片云。

2006年4月12日

## 沪籍卖饼小贩

白衣无垢背微驼，午后洋洋开铁锅。  
街角久来居地利，乡谈足以占人和。  
油浇两滴休嫌少，价贵三毛哪算多。  
对面饼摊谁肯去，民工不怕病磋磨。

2006年4月26日

## 过景山

一木衰亡万古哀，春归依旧牡丹开。  
小山已有长青树，深殿能无不朽材？  
阶下何堪追日月，碑前谁复拭尘埃。  
游人买得瓜皮帽，三五翩翩合影来。

2006年5月19日

## 打工者之搬家

市街拆去旧平房，儿女转来新学堂。

常恨浦东无定所，不称淮北是家乡。  
省租未免门墙窄，谋食何妨径路长。  
楼影参差三十里，单车一线逐阳光。

2006年5月26日

## 闻说近来少女初夜或只售三千元，有感乃作

少女前途亦是娼，源源来自小村庄。  
童贞岂敢夸奇货，身价还须问买方。  
从此堪资读书弟，凭谁空许负心郎。  
可怜无语飞红夜，老客犹嫌体态僵。

2006年5月27日

## 于三十岁生日感怀

春光泻尽草离离，诗道原来达者稀。  
老大不堪夫子畏，穷酸每受妇人讥。  
柏松有志常弯曲，樗栎无材自秀颀。  
俯仰生涯腰亦瘦，翻箱一试少年衣。

2006年6月1日

## 雷雨夜

大厦接云云渐浓，迷离世界小窗中。  
白光射破深深夜，黑雨追来飒飒风。  
忽有沉雷如战鼓，已无长啸应天公。  
每闻洗尽千层垢，只见凋零万点红。

2006年8月21日

## 青山

回望青山且释怀，登车未必赴尘埃。  
水从天外倾斜下，路向人间坦荡开。  
啼鸟又因谁散去，飞花不伴我归来。  
云岚一别相思久，气象如何梦里猜。

2006年10月

## 海上

海上波涛陌上冰，浮云万里阅风情。  
小民梦想东西渡，大事轮回左右倾。  
头上有天应直立，眼前无路且横行。  
昂然也欲乘风去，只是生来骨未轻。

○“上”字有三，不改。

2006年12月

## 浮生四章

### 其一

浮生如幻竟如真，未必桃花识故人。  
梦醒不知还是梦，春深乍觉已非春。  
谁堪落木千重影，我亦流云百变身。  
来日僧庐听夜雨，长街何处刹车轮？

2007年2月10日

### 其二

洋洋春色洒江堤，朽骨何妨入画皮。  
酥雨绽开圆泡沫，浮光折射碎琉璃。  
每将虚影看成我，却把真身拜作伊。  
走马人间听一笑，杨花落处暂羁縻。

2007年2月25日

### 其三

瞬息生涯想像中，茫茫世界一囚笼。  
盛唐飞逝五花马，太古封存三叶虫。

传说火山曾熄灭，怀疑冰海正消融。  
凜然听见寒风笑，且向浮云问始终。

2007年2月28日

#### 其四

砰然何物破深潭，黑白天空幻化蓝。  
日月独来终寂寂，星辰相视且眈眈。  
拈花心印无生有，折苇行程二变三。  
梦想止于沉睡罢，流光一线挂摇篮。

2007年3月1日

#### 厓山

泣血残阳聊半悬，连舟一战没风烟。  
已无成旅兴华夏，犹正衣冠讲圣贤。  
誓鸟平生尽填海，潜龙何日再飞天？  
只今恶浪化春雨，未必腥膻惟百年。

2007年3月26日

#### 江阴



一轮秋重月光寒，杯酒聊沉片刻欢。  
天意不哀明社稷，人心犹殉汉衣冠。  
祖孙各自拼刀刃，姑妇相从跨井栏。  
所幸春来仍乐土，血痕消处泪痕干。

2007年3月27日

## 危楼

危楼独坐到黄昏，邂逅风光看不真。  
日落也能如白昼，花开未必是青春。  
浮云天外皆知己，流水江心亦可人。  
万古英雄书一卷，且于灯下览前身。

2007年6月20日

## 游外滩

风声断续笑声喧，两岸之间隔百年。  
瘦舸如绳穿碧水，高楼似剑破蓝天。  
几回光闪渐迷目，一缕香飘忽擦肩。  
余兴且来轮渡站，游江只费五毛钱。

2007年3月15日

## 过苏州河

几番春雨洗污尘，流向郊村更远村。  
飞絮恰逢新冷遇，垂杨不解旧温存。  
一弯清水随风漾，四面华楼蔽日昏。  
石库门前浣衣女，今宵得否入豪门？

2007年3月19日

## 神州

神州到处在疯狂，三十年来奔小康。  
股市动摇如荡妇，楼盘坚挺胜金枪。  
偶来洪水吞千里，总有青天照四方。  
一路凯歌迎奥运，岳飞跑不过刘翔。

○“来”字重，不改。

2007年8月2日

## 轱辘体·我是流氓你是谁

### 其一

我是流氓你是谁，一声口哨向天吹。

崔丞相府墙头矮，武大郎家帘子垂。  
自有花心纳新故，每因色胆忘安危。  
临屏乱写相思句，奋笔三更不皱眉。

## 其二

临屏无事乱伤悲，我是流氓你是谁。  
苏小死逢诗鬼祭，嫦娥生怕老吴窥。  
人前态度含羞草，梦里心情向日葵。  
弱水三千聊一饮，相思相好不相随。

## 其三

一别莺莺乃忘归，偶将秃笔玷娥眉。  
风如嫖客花如妓，我是流氓你是谁。  
嫪大几时游禁地，明妃三次嫁荒陲。  
佳人未必嫌骚扰，不遇流氓反自卑。

## 其四

何须大款始双飞，自古骚人亦永垂。  
小李情诗无正解，漆庄才气只胡吹。  
鸟生蝌蚪花生蛋，我是流氓你是谁。  
熟读宋词三百首，巫山战绩更累累。

## 其五

聚也多情散也悲，风流且待后人追。  
焚心梦幻新蝴蝶，泣血精神旧子规。  
李白重生皆善饮，屈原不死更能吹。  
坦然一笑春光里，我是流氓你是谁。

○ 奋笔：“临屏诗”中常有“奋笔”“挥毫”“搦管”等词。

2007年8月2日

## 蓝衫

蓝衫落拓到燕京，杜撰风云且自称。  
偕汝乃知诗有用，凭谁常笑士无能。  
貌如花月终衰老，心已沧桑却永恒。  
料想小城宁谧夜，漫天星斗一孤灯。

2007年10月10日

## 方外

方外流光射古今，恒星明灭亦难寻。  
天台故事云泥远，银汉幽期风雨侵。  
百劫与谁终执手，万缘从此不关心。  
来年醉卧长安市，一任尘沙扑素襟。

2007年10月17日

## 戏答友人

平生理想或无稽，老杜当时造化低。  
大势已非人左右，名家都是鸟东西。  
如烟梦且回头看，似水情堪顺手题。  
来日天涯谁一恸，青山默默草萋萋。

2008年2月21日

## 梅花

半分颜色半分香，天性何曾爱雪霜。  
每到残年才绽放，若于三月只平常。  
良朋已认青松客，假子仍收白鹤郎。  
不与牡丹争富贵，一生卖点是凄凉。

2008年7月24日

## 于三十四岁生日有感

平生得意只文章，久住京华不肯狂。

天下有谁真有用，人间无我亦无妨。  
一时巨浪腾千尺，万古轻烟散八荒。  
欲与青山争妩媚，青山犹是少年郎。

2010年6月1日

## 城南

城南六载抱天真，说尽豪言剩此身。  
一别各成千里客，重逢俱变两般人。  
天涯灯火销魂夜，海上烟花炫目春。  
莫道书函依旧在，想来今日满灰尘。

2011年1月21日

## 轱辘体·我们都是木头人

### 其一

我们都是木头人，念罢童谣且当真。  
听话也曾停动作，唱歌聊以振精神。  
接班志气三千丈，应试文章十二春。  
一角红旗心上挂，临风何日染灰尘？

### 其二

一线流光百变身，我们都是木头人。  
欲成虎豹先成狗，不信官商且信神。  
失业才知真寂寞，偷情也爱假单纯。  
东风彻夜无消息，只有猫儿在叫春。

### 其三

喷泉池畔忆星辰，飞浪轻烟假亦真。  
这里再无钉子户，我们都是木头人。  
八方灯射深沉夜，万里沙侵烂漫春。  
且对东方一声吼，不成功也不成仁。

### 其四

四野寒烟锁住春，一轮红日破清晨。  
岂无豪杰能除害，又有英雄在造神。  
物种渐成金字塔，我们都是木头人。  
只今莫读千秋史，近事回眸已失真。

### 其五

天涯日月海中尘，万载轮回不坏身。  
国国每分新敌友，官官仍似旧君臣。  
谈心未必能随便，表态何妨且认真。  
闭上眼睛终一叹，我们都是木头人。

○其三“方”字重，不改。

2011年4月10日

## 网中会旧同学

陋室孤灯烟一支，还乡惟恐故人嗤。  
三千里外重相会，二十年来两不知。  
当日谁曾夸永久，今宵我亦爱奔驰。  
沧桑叹罢童心在，更有豪情骂老师。

2011年12月22日

## 平生

平生万事不应当，所谓伊人在四方。  
徒手也难携淑女，师心未必慕先王。  
新邮件似春潮涌，老照片如秋叶黄。  
昨日之愁终可笑，年年删去旧文章。

2012年4月29日

## 十方

十方何处觅前身，断片纷纷看不真。



万象叠成今日我，一心留下去年人。  
山间云已溶于水，天外星将散作尘。  
独坐深宵归路远，与谁携手到青春？

2013年6月10日

## 无题（二）

逝水流光古亦今，闲愁抛下复追寻。  
也知与汝难携手，莫问是谁先负心。  
大路千条连作网，高楼十面列如林。  
登车不管归何处，从此情歌变噪音。

2013年7月13日

## 闻斯洛离京，乃作一律以赠之

春光逝去肯重来？廿载寒窗实可哀。  
四海公平如放屁，一生成败在投胎。  
乘风柳絮飞将落，沐雨梨花谢复开。  
憔悴何愁同学笑，未名湖畔尽庸才。

2014年4月12日

### 无题（三）

碌碌中年仍放肆，文章聊以夸才智。  
多情难免又无情，大事将来皆小事。  
海上浮云眼下消，天涯落日心头炽。  
此生若不售千金，到死何须留一字？

2014年7月6日

### 无题（四）

春有韶光夏有风，今年仍与去年同。  
情怀激越吹嘘后，意气消磨等待中。  
洪水不甘归大海，高山无力触长空。  
圣贤万古皆灰烬，万古飞花一样红。

2014年7月14日

### 流光

流光逝尽剩悲欢，独醉深宵暖复寒。  
有雾霾时应气短，无烽烟处且心宽。  
百行不及当官好，万事何如置业难？  
暂住京华人渐老，他年随汝到邯郸。

2015年2月2日

## 无题（五）

情也非真梦也残，思之无益忘之难。

万缘似水淹三昧，一念如丝变百端。

斟酒欲催心上热，披衣不减骨中寒。

生涯未断人间小，来日相逢且尽欢。

2015年2月7日

## 变体诗 词曲

### 调笑令

花艳，花艳，正是芬芳红遍。当春香满路途。谁念  
几株草枯。枯草，枯草，泥底无人相悼。

○少年不识古韵，以“艳”、“遍”相叶。不改。

1992年春

### 临江仙·日暮

一阵云烟天际过，夕阳千里蹒跚。风吹渐没葬层  
峦。目穷西已尽，宇宙却还宽。

既道英雄常落魄，也曾无谓寻欢。夜来潇洒对银  
盘。何愁丰羽日，不度万重关。

1995年6月

### 浪淘沙

化蝶舞翩翩，无意缠绵，钟情只为落花颠。一夜南风浑不识，今夕当年。

往事渐无言，过眼成烟，我心愿付白云边。望断天涯晴万里，旧梦沉眠。

2000年7月24日

## 鹧鸪天·老姑娘

十载孤窗月一轮，流光过处岂无痕？可怜点点青春痘，换作丝丝鱼尾纹。

听旧曲，看新闻，香肠杯面自由身。隔墙何事频欢笑，明日三丫又嫁人。

2003年2月20日

## 清平乐·赌徒

烟飘色变，连夜惊酣战。掷尽身家何敢怨，手底瘪牌又现。

妻儿泪满申江，头家笑傲苏杭。时有公安突击，搜钱罚款真忙。

○头家：此处指赌场老板。

2003年8月25日

## 鹧鸪天·挤车

每到晨昏总误差，悠悠颤颤任喧哗。厢中男女粘如饼，窗下孩童缩似虾。

胸窒闷，脚酸麻，停车一震且呲牙。司机回首频呼唤，挤挤后门能上仨。

2003年9月16日

## 鹧鸪天·升旗

仪式新开情绪高，街边集合勿私聊。胖哥脚底香烟灭，大姐胸前领带飘。

排好队，挺完腰，先听老板训规条。起来歌里红旗上，一散依然卖苦劳。

2003年9月22日

## 鹧鸪天·骑车

脚踏轮飞意也奢，而今不算出无车。休言后背肥如虎，每到前坡扭似蛇。

听气喘，任腰麻，远离大道避喧哗。东邻时有群倭动，练好身心守国家。

2003年9月24日

## 鹧鸪天·黄金周之火车硬座车厢

起座凭他客满廊，人逢急事总张狂。千回百转边门到，二女三男厕所藏。

能忍耐，且商量，相持不下又何妨。忽然听得前头唤，后面车厢有地方。

2003年10月6日

## 清平乐·理发

青丝飘荡，蛮有诗人样。省事省钱随你长，怎奈日间常痒。

前街细剪精修，后街香艳温柔。一路寻来桥底，小摊水似原油。

2003年10月21日

## 虞美人

珍藏小照偏磨损，未敢轻轻吻。想来你也做妈妈，生的可能还是小洋娃。

依稀那夜风萧索，松手花儿落。若能重会是良朋，不用再将缘分许来生。

2004年1月4日

## 中吕·普天乐·清理乞丐

整武装，奔街巷。五星闪闪，斗志昂扬。行乞人，全清荡。白发盲流重流放，残疾娃娃遣他乡。（喜得那）良民鼓掌。（从今后）繁荣景象，盛世堂皇！

2004年1月9日

## 鹧鸪天·磨刀老头

砺石弯弯岁月长，摆摊街角且开张。也于树下谈天气，岂有刀尖映夕阳。

腰腿木，鬓须霜，楼区铁锁各冰凉。当年板凳千家过，吆喝声声串弄堂。

2004年3月25日

## 鹧鸪天

对面心情总费猜，烛光摇曳旧形骸。倾听往日风行曲，侧看沿街广告牌。

言已尽，怨深埋，咖啡苦涩口难开。仰天一笑昂头去，不许泪花流下来。

2004年4月2日



## 鹧鸪天·重游文庙书市

两手空空过走廊，而今只看旧城厢。街边偶尔车拦路，门外依然桶靠墙。

天色晚，地摊长，花生嚼尽口余香。兴阑就饮红茶铺，弗是当年老板娘。

2004年5月16日

## 瑞鹧鸪·同桌的你

少年痕迹且追寻，独唱情歌任走音。与我划开三八线，听谁拨响六弦琴？

别时到底难开口，十载依然最动心。电话几回提在手，无由相问每沉吟。

2004年7月18日

## 临江仙·晨起偶感

十载穷途行不断，消磨足下春光。徘徊是处与他乡，谋生宜老练，入梦复轻狂。

睡眼昏昏临晓镜，刀锋划落冰凉。忽然抖擞看前方，虬髯才扫尽，便似少年郎。

2004年7月19日

## 鹧鸪天·手机

偶逢故友，问及手机，因许久不用，有感乃作。

任尔蓝屏换彩屏，网绳了断自安宁。耳边寂寂心中定，腰侧空空脚下轻。

无事业，有家庭，何须短信夜传情。昔年偏爱提于手，笑傲街头一串铃。

2004年9月7日

## 临江仙·午餐

开闭电梯人渐挤，平生不耐楼高。底层缓步让同僚，门前洋酒店，门侧麦当劳。

抖擞精神门后去，馒头煎饼糖糕。面摊一坐气堪豪：“今天加个蛋，多付两毛。”

2004年9月15日

## 浣溪沙·戏题月饼

又是西风撼老槐，探亲访友似交差，交情深浅看名牌。

无可奈何钱用去，似曾相识饼归来。匣中久置起青苔。

2004年9月21日

## 虞美人·儿歌

那边就是云深处，一夥神仙住。太阳累了想回家，  
脸蛋红红歪着叫妈妈。

星星慢慢睁开眼，大地真辽远。庭前小树在伸腰，  
宝宝明天伸得比它高。

2004年9月25日

## 鹧鸪天·洗头女

清水香波十指凉，灯昏不觉误春光。芳心老去难开  
窍，毛手伸来勉设防。

风飒飒，夜茫茫，凌晨有泪梦家乡。中秋忽得家乡  
信：表妹回村起大梁。

2004年9月29日

## 鹧鸪天·少年三轮车果贩

柚子金黄橘子青，果儿甜美价公平。不妨一路声声  
唤，只愿三轮渐渐轻。

回首望，俯身停，随时冲刺遁其形。机灵真个追张嘎，敌寇何如日本兵？

2004年10月21日

## 鹧鸪天·下班

游走长街看四方，霓虹灯下各奔忙。“河南骗子新疆贼，东北流氓湖北娼。”

松领带，敞西装，昏昏挤入大车厢。扶窗一噓华楼远，无限金风刺眼凉。

○引号内乃他人之偏见，作者并不以为然。

2004年11月19日

## 捣练子·有个娃娃

春草绿，小溪流，有个娃娃在放牛。阿爸阿妈城里去，明年接我住高楼。

锄莠草，舞镰刀，迎着太阳伸个腰。小伙伴们游水去，爷爷夸我最勤劳。

汤白煮，肉红烧，月亮圆圆上树梢。阿舅回乡收稻子，他家表弟跨书包。

挪板凳，贴窗花，日子长长减又加。阿爸阿妈来了信，今年春节不回家。

○跨：今人往往写之为“垮”。

2005年1月21日

## 瑞鹧鸪

相偕不语手难牵，如此漂浮人海间。知我有妻兼有子，别君三载另三天。

长街何处堪留恋，老屋今宵未拆迁。旧日阿婆仍在否？一星灯火漫窗前。

2005年2月4日

## 鹧鸪天·纺织女工

追逐繁华到远方，繁华世界一围墙。飞尘似雾车间漫，流水如潮指下忙。

无昼夜，任炎凉，昏昏归去懒梳妆。红颜失色蓝衫旧，不许阿哥来梦乡。

2005年3月25日

鹧鸪天·公司附近一拾荒婆  
近日改业行乞，乃为之赋

海上风云动九天，拾荒事业亦硝烟。每逢少壮难相斗，所幸衰残或见怜。

爬路口，卧街边，叮当谁掷一毛钱？报章凿凿时披露：乞丐年薪十万元。

2005年4月1日

### 卜算子·于陆家嘴散步

大道伏车龙，十里春风杂。五彩华楼灰色天，笼抱明珠塔。

有个女儿嗔，有个男儿拉。多少悲欢上演忙，我是行人甲。

2005年4月14日

### 鹧鸪天·上海某妇

天意无常梦有涯，此心惟系一娇娃。筹钱十万殷殷望，毕业三年事事差。

耽琐账，备粗茶，衡门之外是繁华。小姑原在山村住，儿女纷纷据我家。

2005年5月16日

### 鹧鸪天·老挑夫之失业

膀臂经营五十秋，扛包未必气咻咻。立心供学孙儿盼，徒手归家老伴愁。

蹲巷尾，望街头，近来巡队满城搜。无非盛世妆风貌，不许穷人做马牛。

2005年6月3日

## 清平乐

三更脚步，踏向情深处。桥下车声街畔树，来去也曾迷路。

花儿坠入泥沙，月儿还在天涯。仿佛那年深夜，步行送你回家。

2005年7月24日

## 鹧鸪天

我亦多情亦薄情，少年游荡更无凭。身如沧海浮沉浪，梦是银河聚散星。

春色远，夜灯明，繁华十面剩零丁。平生未有传奇事，所谓传奇都是卿。

2005年8月3日

## 鹊桥仙

银河万里，流光无尽，佳会一年一度。鹊桥仍见玉人来，且忘了、沧桑今古。

深情相拥，低声相问，又是匆匆回顾。如斯恩爱到天荒，免得那、油盐酱醋。

2005年8月11日

### 临江仙·屡言出书而不果， 为友人所笑，乃答之

一自三春过后，有谁好梦如初。文章到底不成书。旧诗常窜改，往事渐删除。

山野本无大道，风光只在穷途。孔明当日卧茅庐。他年真得意，做个守财奴。

2005年9月5日

### 鹧鸪天·胡作

千丈愁丝剩二毛，青春失落在深宵。痘于脸上何堪破，痒到心头不可挠。

风一夜，尿三泡，泥尘肥厚落花骚。门前野鸟纷飞去，要向银河建大桥。

2005年9月12日



## 临江仙·野孩子

大路长长棚屋小，汽车吹起泥沙。又升炉子又烧茶，没人陪你玩，自己过家家。

爸爸今天生意好，回来带个麻花。门前走着读书娃，有人欺负你，别告诉妈妈。

2005年9月29日

## 瑞鹧鸪·某打工者失犬，乃赋其状

八方风雨夜凄凄，灯火缤纷道路迷。从此无亲亦无友，与谁相语复相依。

几番追忆来河畔，数载飘零到浦西。街上偶然逢黑犬，痴痴犹自唤皮皮。

2005年11月10日

## 鹧鸪天·见本地一少女摆摊卖臭豆腐，乃为之赋

花信年华总是春，秋风飒飒火炉温。开颜几度迎新客，垂首何堪遇故人。

多赶逐，亦逃奔，寒家第一要生存。四邻相看应无愧，不在娼门与赌门。

2005年11月12日

## 临江仙·苦力散工

市集东南拐弯处，三三两两闲蹲。卡车停后乱纷纷，可怜争闹者，偏是故乡人。

毕竟徘徊空手去，老街孤影黄昏。一星灯火暗蓝门，偶然斜瞥过，飞吻亦销魂。

2005年11月28日

## 菩萨蛮·下班时顺路于乐购买菜， 欲乘免费班车

七毛买棵黄芽菜，悠然独步长廊外。见我上车门，司机忽发昏。

“前街常堵塞，何况无他客。赠汝两元钱，请乘巴士还。”

2005年12月22日

## 鹧鸪天·公交车上遇老同学

涌至窗前惊欲痴，倚栏相对复何辞。当年有志奔千里，此际无能动四肢。

君失意，我伤时，他人未必尽如斯。若谁驾得名车去，大路迎头亦不知。

2005年12月30日

## 临江仙·市场部同事因业务惨淡去 职

成败多由天定，辛劳未必丰收。半年风雨一时休，  
飘零人已惯，离别不知愁。

此日看君先去，明朝恐我难留。浮生枉自问书邮，  
沉沉通讯录，遗失在街头。

2006年1月9日

## 临江仙·男女厕所之女清洁工

灯下瓷砖明似镜，青丝易惹灰尘。一竿拖把一竿  
身。游移小天地，何必问乾坤。

尽日昏昏来又去，有时忘了敲门。也无惶恐也无  
嗔。低头浑不见，彼此透明人。

2006年2月24日

## 浣溪沙·重过通州路

来此忽然吟上邪，当时无语立长街。低头惟看小凉  
鞋。

万里江湖千顷泪，十年风雨一声嗟。路灯留个影儿  
斜。

2006年3月14日

## 临江仙

夜尽每愁喧闹，春来却怕零丁。此心如火复如冰，  
无端流作泪，只是向谁倾？

逝水不能重返，浮云聊且同行。他年小镇忆生平，  
采莲人亦老，隔岸煮红菱。

2006年4月2日

## 瑞鹧鸪·夜晚于河岸散步有感

乌篷寥落白莲涇，灯火朦胧草色青。踏月几经追梦  
幻，乘风何不放魂灵？

三生印迹深如海，一入轮回散似星。他日同归观自  
在，看君长奉小瓷瓶。

2006年4月14日

## 摸鱼儿

料前生、也曾携手，也应无怨无悔。烟花散落春消  
息，今夜依然憔悴。虚室内，深巷外，车声滚滚流如  
水。熄灯难寐。咏数阕新词，斯人不语，还我两行泪。

杯中酒，仿佛多情滋味，几番因此沉醉。悲欢尝尽  
才回首，幻影一时崩溃。岩石碎，波浪沸，浮云来去千

千岁。茫茫重会。只莫再分离，是缘是孽，且向佛前跪。

2006年4月19日

## 鹧鸪天·老门卫

染罢银丝立铁门，临风一挺老腰身。退休金薄堪糊口，进取心高肯养神？

来故友，话邻村：保安都换少年人。明年若亦归家去，怎得余钱报子孙。

2006年4月28日

## 减字木兰花

梦之世界，密码层层谁破解？黑白交叉，光影撕开七色花。

一声尖叫，不可哭时惟可笑。万籁凄清，呓语假如遭窃听。

2006年5月11日

## 临江仙

那日野花听一笑，低眸便是松冈。钟声敲罢黍炊香。云烟无变化，风雨自清凉。

不了情丝牵袂去，忽然坠入春光。飘零未必在他乡。侧身皆大道，回首亦前方。

2006年7月7日

## 鹧鸪天·与友人饮酒闲谈有感

奔走长街在早晨，自由谈笑在黄昏。世间总有开心事，座上应无闭口人。

烟散漫，酒香醇，昏昏翘首看新闻。神州气象何须问，风雨凄凉也是春。

2006年9月

## 临江仙·月

莫叹温柔如水，可怜消瘦如弦。一年能见几回圆？相随千里路，还隔九重天。

皎洁迎来风雪，迷蒙付了云烟。今宵倦倚小桥边，柳丝缠住梦，斜影漏阶前。

2006年12月9日

## 鹧鸪天·老姑娘（二）

几度春风谢腊梅，窗前弹指落烟灰。芳龄每怯诸朋叙，好事频愁二老催。

听夜雨，忆冬雷，红茶饮淡两三杯。朝来忽遇邻家姬，扯手叨叨又说媒。

2007年3月7日

## 浣溪沙·江南烟雨

何处琴声漫十方？小桥斜倚旧红房，有人檐下湿衣裳。

绿伞撑开青涩梦，乌篷摇入黑甜乡。一弯春水渐苍凉。

2007年3月13日

## 减字木兰花·在地铁车站

灯箱游走，人海浮沉南出口。炽热之光，一抹灰尘触手凉。

无声脚步，想象街心跳个舞。滚滚车流，夜色延伸黑镜头。

2007年3月14日

## 鹧鸪天·胖姑娘之负约

衣柜翻来三五回，长裙终不见腰围。吃些糖果才消气，看着时钟且皱眉。

猫子叫，蝶儿飞，呼呼一任暖风吹。年前爱对他人说，到了春天就减肥。

2007年4月12日

## 临江仙·惊梦

恍若无边荒野，猛然四面泥墙。聆听呼吸在延长，有花凋谢去，如涩亦如香。

影子沉于深黑，镜头泛作微黄。谁家窗外挂铃铛？密帘弯一缝，漏不出春光。

2007年4月13日

## 鹧鸪天·老姑娘之做伴娘

又逐欢声入礼堂，低眉不必赛红妆。怕人冷落愁人问，代酒殷勤借酒狂。

华宴散，夜风凉，二三姊妹话沧桑。小丫定在中秋嫁，也欲相邀做伴娘。

2007年4月23日

## 浪淘沙·云



行迹任千般，心也安然。闲来舒卷海天宽。纵使狂  
风吹不住，瘦影盘桓。

往事在江川，身世无端。前途未必雨潺潺。待向人  
间飞作雪，白了青山。

2007年4月29日

## 瑞鹧鸪·老姑娘之长假

深宵几度忆家乡，长假来时却说忙。在外犹称小儿  
女，回村就变老姑娘。

屏中谁复堪调笑，灯下何妨未画妆。一夜手机无短  
信，咬牙删去旧情郎。

○屏中：指网络中。

2007年5月2日

## 浣溪沙

所谓相思未必真，相思聊且忆青春。山盟海誓总销  
魂。

一死再无回首日，三生终是负心人。不如今夜了前  
尘。

2007年6月18日

## 临江仙

华发久缠耳鬓，银须忽逼咽喉。春光一线去如抽。  
刀锋轻划过，了断几多愁？

梦想也应无限，飘零未必无休。泯于人海困于秋，  
雪花和柳絮，白不上眉头。

2007年6月21日

## 贺新郎

十几年颠簸。更依稀，那些梦想，那场烟火。那夜  
风中谈故事，谈到三生因果。月已缺，流星已堕。玉腕  
一挥松手去，恰老街天色深如锁。你向右，我朝左。

清风枯了花千朵。也中年，也应无语，也应看破。  
他日假如真再见，找个亭儿闲坐。问只问，都还好么。  
欲说今生缘分薄，怕来生，忘却今生我。人海内，擦肩  
过。

2007年7月24日

## 鹧鸪天·群租房

百丈华楼飞鸟旋，底层西角聚人烟。十男九女分三  
列，两室一厅租四千。

无凳坐，有床眠，起来谁占卫生间？出门暂仰梧桐树，不见家山广阔天。

2007年7月30日

## 浣溪沙

折柳情缘有若无，远方灯火映归途。临风一醉到江湖。

或许他年仍懊悔，不妨今夜又糊涂。人生最好是当初。

2007年8月

## 临江仙

宝剑如霜心似铁，几时截断昆仑。江山到底付他人，千秋升日月，一样照乾坤。

自古英雄常绝后，不须痴傻儿孙。风流来去岂无痕，今宵灯火下，谁复笑前尘。

2010年10月

## 鹧鸪天·手机（二）

不看池塘不看山，春风与我不相干。做些俗事消消闷，找个闲人问问安。

新语录，旧名单，深宵读遍又重翻。也知某某成空号，存了三年未忍删。

2011年3月31日

## 临江仙

来日忽然将至，今宵也似曾经。小窗孤影到天明，沧桑聊一瞥，北斗亦飞星。

故友不堪常见，老歌且自重听。半生名利半生情，几番加减后，得失等于零。

2011年6月26日

## 木兰花

人生到底归沟壑，向北向南终是错。徘徊不觉已中年，四野茫茫天漠漠。

千山以外花凋落，万载之前星闪烁。所闻所见只如斯，所谓聪明皆自作。

2011年11月4日

## 临江仙·戏题某君名片

席上殷勤呈纸片，几行文字庄严。有人钦佩有人嫌。有人拿过去，聊以作书签。

莫道行踪无定处，光芒岁岁增添。愿君来日立山尖。手持千丈布，一列头衔。

2012年1月12日

## 沁园春·戏和伪诗王

一世匆匆，行也潇洒，坐也雍容。看流星如箭，射穿长夜；寒风似帚，扫尽残红。李杜文章，孙吴智略，黄土青山亘古同。空追忆，恰小窗之外，万象朦胧。

天涯偶尔相逢，才出手、狂徒技已穷。笑赏金承诺，终归虚幻；擂台生意，徒自兴隆。击节高歌，横刀轻叹，只见虫儿不见龙。虽无敌，且回家睡觉，懒得称雄。

2012年1月13日

## 临江仙

落日又将升起，浮云难免归来。尘埃毕竟是尘埃。人生天注定，国事党安排。

假面终于看破，真心也已抛开。今时总笑那时呆。纵然星火亮，我亦不成柴。

2012年7月1日

## 卜算子·过广渠门桥

风雨两千年，不见长城倒。大路依然车往来，都市依然好。

活着且奔忙，死了他人笑。下一分钟轮到谁，只有天知道。

2012年7月27日

## 西江月·饮酒

天下本无末日，人生只在今朝。提壶也爱远尘嚣，也爱四周喧闹。

醉酒何妨半醉，消愁不必全消。留些清醒与牢骚，长夜悠然吟啸。

2012年8月20日

## 菩萨蛮

平生万事皆儿戏，赴京也欲争名利。才岂赫千年，诗能值几钱。

圣人终不作，今日谁相若。教授有门徒，官商有秘书。

2015年3月9日

## 浣溪沙

来去京华一梦间，匆匆扰扰复闲闲，百般滋味不新鲜。

最可笑人如往日，更无聊事在明天。成名依旧待他年。

2015年3月9日

## 鹧鸪天·家电维修个体经营者

独坐聆听喧闹声，小街残破亦申城。螺丝刀下光阴转，虎口钳中世界崩。

人易老，事难成，房租来日复攀升。也知旧物应抛弃，不信谋生靠技能。

2015年4月16日

## 沁园春

千古燕京，久别相思，久住相憎。看八方楼宇，皆非定所；五环道路，应是归程。世海深沉，人潮跌宕，身在其中第几层？飘零惯，且匆匆抛却，枕畔台灯。

知谁负了前盟，更负了杨花飞满城。任韶光留下，沿街行影；清风拂去，隔岸歌声。也欲追寻，也将遗

忘，也说当初即永恒。无聊甚，只三年如此，何况来生。

2015年5月19日



## 异体诗

### 小乞丐

断腿的孩子，爬行在路旁。  
漂浮的城市，冷漠的风光。  
手已经太累，路依然很长。  
云飞的方向，是我的家乡。

○此亦五言律诗也，然再三思之，终非正体。

2003年7月10日

### 我

我是我无法挣脱的枷锁  
我是我即将崩溃的王国  
我是积雪中炽热的疯狂  
我是浮云下永恒的寂寞  
哦 就这样吧  
就这样  
走在人间的角落

明天  
做一个潜行人海的刺客  
寒光收敛  
虚影交错  
刹那间  
砍下那高贵的头颅  
献给那光荣的传说  
春天到了  
我听见了花儿的呻吟  
也看见了风儿的闪烁  
糜烂的冰雪  
随着阳光的脚印  
淹没了死亡  
灌溉着生活

○ 整理旧稿，乃见此篇，终不知何时所作也。

## 附录一 骈体文章

### 《双百诗词集》序

双百者，昔毛公倡之以兴文艺也。今文运式微，诗风不振，故高公占祥作《双百诗词集》以阐之。余忝在相知之列，幸能先睹其篇。

余观之名止一书，实为二集。其一，以百诗呈百花之态；其二，以百词传百鸟之神。诗乃七言，尽合精严之律；词分百体，各成婉转之音。遂有春桃、秋桂、冬梅，须臾开遍；山雀、天鹅、海燕，次第飞来。芳影缤纷，请牡丹斗艳；清声跌宕，与仙鹤争鸣。然百花终不能齐沐天恩，百鸟亦难免偶违人意。惟应宥海棠之香少，赦蔷薇之刺多，容鹦鹉之妄言，恕鹧鸪之无用，任之随其性，放其怀，取其乐耳。

若夫陶渊明之采菊，周茂叔之爱莲，杜子美之题鹰，苏东坡之咏雁，皆假花言志，托鸟抒情也。菊莲有嘉卉之名，鹰雁在珍禽之谱，是以先贤常以之自况，为此独吟。至于访闲花，探野鸟，喃喃得句，一一成章，则亘古未尝闻之，而今始得见矣。

嗟乎！闲花野鸟，俱为天地所生；过客行人，谁是山川之主？岂可因一时之欲壑，竭万载之能源，散尘气于长空，泄石油于沧海，竟使繁花失色，群鸟绝踪哉？呜呼！智者忧天，狂生愤世。大人忧道，寒士愤时。公之耽忧，忧也在骨；余之发愤，愤也同心。愿茂盛之中华，百花相映；信和谐之圣代，百鸟自由。

双百诗词，余敢序之。此其受添花之任而待著粪之讥焉。宜乎宜乎，陋之必也！

○世：三十年为一世。

辛卯孟春于川杨河畔

## 同明德赋

大千世界，遵五德而有常；凡百英贤，秉一心而多窍。昔文王演易，乃测天机；孔子传经，以匡世道。传之既久，遂奏其功；顺之则昌，足显其效。是以四夷消长，不毁文明；历代兴衰，皆崇礼教。

洎乎晚明多难，荒岁无期。昊天不吊，国祚是移。彼东胡虽掌河山，固非龙裔；枉称尧舜，难免狐疑。乃变儒冠为髡首，变汉服为寿衣，变黎元为奴婢，变华夏为蛮夷。至于利炮远来，一轰而溃；坚船纷至，百战而疲，犹防兆民之反，而忍列国之欺。于是，壮夫怒啸，墨客悲啼。咸曰：今当非古，东不如西。欲图强于季世，竟归咎于仲尼。

清廷既废，军阀相争。狂人呐喊，虚士纵横。或乃土苴经传，腐朽忠贞，妖魔祖考，梟獍英灵。迨及神州复定，大国中兴。公卿尚学，士子求名。仍以趋时之教授，为晓古之精英。殊不知今日尊儒之院校，即当年反孔之阵营。

呜呼！外道文章，勃乎稷下；正宗学术，散向民间。遂有一丹设馆，元茗登坛。同同道以兴六艺，明明德以赫九天。然则青衿拜谒，红袖盘旋。或吟诗于楼上，或问易于堂前。或抚琴于柳岸，或对弈于

花园。或捧书而恭敬，或把盏而狂颠。或重逢而叙旧，或初会而忘年。

凝尘尽扫，孰非陈榻之宾；积雪方融，我亦程门之弟。善哉！其道无穷，其乐无已。诗曰：既见君子，云胡不喜。

癸巳仲春于北平东郊

## 附录二 彼岸诗话

### 彼岸诗话

中国诗乃分五体。诗经、乐府，诗家之先祖也，故名之曰“古体”；律诗、绝句，诗家之正宗也，故名之曰“正体”。词曲，诗之变也，故名之曰“变体”；歌谣，野而杂也，故名之曰“杂体”。“新诗”，兴于乱世，源自异邦，或无韵也，故名之曰“异体”。

旧谱既佚，古乐无存。然则天下词曲，皆句读不葺之诗也。是以晏元献、苏子瞻之篇，可读可爱；周美成、姜白石之作，难唱难传。今人或倚宋词之平仄作《大有》《花犯》《暗香》《疏影》，填之费力、读之拗口，不亦愚哉！

观谱而填词者，必不善之也。词律本于诗律，是以宋词常有拗救之变，其中详细，非后世之词谱所能尽说也。今之能诗者知其句式，即可作之，何须谱哉！

诗家工夫，在诗内，不在诗外。不谙诗艺者，虽有唐虞之德、伊吕之功、孔孟之心、孙吴之智，亦不能诗也。昔陆游有古风《示子遫》曰：“我初学诗日，但欲工藻绘。中年始少悟，渐若窥宏大。……汝果欲学诗，工夫在诗外。”读之乃知其早岁欲工藻绘，中年始“窥宏大”焉。而游不明事理，乃教初学者先求“诗外工夫”。遫承庭训，遂无诗名。

今之诗人常以自家之心，妄度他人之事。披裘窗下，看雪霜而不识其寒；曳履江边，听风浪而不知其险。贫者惟以野菜果腹，富者偶以野菜清肠，其中滋味，岂得相似？故诗人只宜抒一己之情，不可称万民之意。不然，则难免矫情而夸诞矣。

今人论诗，乃有四误。一者，以言词之典雅为美；二者，以境界之博大为美；三者，以气韵之高古为美；四者，以意象之新奇为美。吾论诗，只论诗艺，于彼四者，皆不以为然。诗艺者，在乎声韵天然而不失和谐，对仗自由而不失工整，语言凝练而不失流畅，结构严密而不失变化，修辞新颖而不失切当，白描质实而不失生动。此六者，非不可知也，然行之甚艰，故今之诗人，多避重就轻，耽于四误。

昔明人有句曰：“万事不如杯在手，一生难得月当头”，工稳洒脱，允为佳句。王静安作《浣溪沙》，乃偷之曰：“万事不如身手好，一生须惜少年时。”属对不工，俗不可耐，是点金成铁也。静安作《人间词话》，侈谈境界，而不知诗艺为何物。观其词作，乃知其不通之甚矣！

唐人七律，或以崔颢之《黄鹤楼》为冠，然今人学诗，终不得以《黄鹤楼》之平仄为式；或以杜甫之《登高》为冠，然今人学诗，亦不得以《登高》之对仗为式。

吾友孟兰善七律，每有佳篇，辄与古人较。吾因而哂之曰：“我于圆周率，当胜祖冲之。君诗虽如李杜，亦不足道。”

杜少陵曰：“语不惊人死不休。”李易安曰：“学诗谩有惊人句。”程勉之曰：“不要惊人要感人。”

诗宜白，而不宜直。晦涩之篇，岂可流传于四海；浅直之作，只堪吟唱于一时。故曰：“吟之爱之，究之叹之。不能忘之，所以善之。”

词性者，西洋泊来之说也。西文有词根、词缀，见其词缀，乃知词性。汉语则无之。今之诗人往往受误于王力，唯知以“名词”对“名词”、“动词”对“动词”，此乃遵异邦之法度，作中国之文章也，虽似可行，终非正道。对仗之要，在于上下之结构，同则工，异则不工。故“春秋”宜对“冷暖”，而不宜对“夏日”；“淑女”宜对“狂夫”，而不宜对“英雄”。若以“冷暖”对“英雄”、“夏日”对“狂夫”，虽不甚佳，亦非不可。吾尝以“岁月”对“乡村”，或曰：“‘乡村’者，地理也，若对以‘山水’则更工整。”曰：“‘乡’中有‘村’，‘岁’中有‘月’，然则此对之工，非‘乡村’、‘山水’之对可及矣。”

闻一多尝曰：“依律作诗，如戴镣铐而舞蹈。”谬矣！诗之格律，当如舞曲之节奏也。能者从心所欲而不逾矩，不能者为其所困而常有失。民国之士承晚清之弊，慕泰西之风，往往不通经史而妄谈，不善文章而滥作。今之学者或善之、媚之、宗之、法之，是以寒窗十载，反受其误。

自古法太白诗而神似者，唯毛湘潭一人耳。

姑苏画师江海菱尝问吾曰：“《清平乐·平林漠漠烟如织》允为李白之作否？”曰：“凡篇耳，无论作者。”海菱惊曰：“此绝唱也，何以凡之？”曰：“用字不精。如‘暝色入高楼’，终不及‘暝色没高楼’。”

太白诗雄浑豪迈而往往不工。如“白发三千丈，缘愁似个长”，分明尽如白雪；“不知明镜里，何处得秋霜”，仿佛初见银丝。前后不合，殊无章法。

吾素不爱陶渊明之“悠然见南山”“心远地自偏”，然读其《乞食》诗，则一时失笑、一时坠泪。

辽东诗友姜松好仿古，每以拟《诗经》《乐府》为能事，然不识古韵，乃以入声与上去二声通叶作四言诗。吾尝哂之曰：“读姜松诗，



如见一周鼎，其上有小字云‘公元前八百年铸’。”

湖南学究熊东遨评某初学者诗，以“离退”直白，命之改为“解甲”。吾闻而笑曰：“彼非将士，如何‘解甲’？‘离退’虽俗，犹胜雅而不当者也。”

辽东诗友于文政以工于格律自矜。其律诗、绝句无孤雁出群，亦无特拗句。然每以“奇”“谁”、“元”“门”相叶，今人读之不甚佳。此诚泥古而不通今、有力而不善用者也。

吾有徒弟名杜斌，谋食于深圳。每以生计窘迫，无暇读书作诗为憾。吾劝之曰：“我每于用餐时读经传，如厕时作文章。”

号复古者未必知古，欲拟古者未必似古。无论古人精神，且以格律验之，便知其实。留社诸生皆以守旧自矜，然秦鸿不识拗救之道，乃以“二四六分明”为据，妄断他人出律。碰壁斋主以为“平仄仄平仄仄平”非孤平，留社诸生多然之，且引经据典，喋喋不休。或曰：“留社之诗，虽无灵气，然典故甚多，亦学人之作也。”吾闻而笑曰：“穷搜僻典，生造新词。‘学人’才学，不过如斯。”

四川诗友陈诚尝谓吾曰：“窃以为先生文字虽工，然敬畏诗词之心，终不如留社诸生也。”曰：“诗词于我，乃如胶如漆之爱侣，于彼，乃亦真亦幻之天人。”

岭南学究陈永正尝曰：“旧诗只宜原封不动，回归古雅”，是不愿诗之声韵、气象稍有更新哉！吾尝观其诗集，但见陈言，终欠诗艺。如五律颔、颈二联有句云：“任从风托叶，我自爱孤馨。将恐户扉闭，料量庭月清。”“绪风多凜冽，挂席愿从容。亦爱此间乐，难任离思东。”皆用字不精、行文不畅、属对不工，且以词韵作诗，亦不免有所变革矣。众人或谓之守旧，而能诗者必陋之也。

香港饶宗颐先生素有国学大师之称，然其所作《洛阳伽蓝记校笺序》气脉不畅，对偶不工，如“寓褒贬于兴亡，吐奇思于鉴戒”云云，不过明清老童生之笔力耳。或曰：“饶公未必以文采见长。”曰：“不能藏拙，难免贻笑。”

饶宗颐先生有《菩萨蛮》之句曰“眼枯泪欲无”，乃犯孤平，此观谱而填词之弊也。吾尝观其诗集，居然无一佳作。或曰：“饶公之书画亦不甚佳。”或曰：“饶公之论文亦不堪读。”噫！夫国学大师岂袜线之才乎？

台北学究龚鹏程素好大言。其五言《赠少白》云：“诗亦吾家事，感君聊一吟。松声听海幻，桃花去住心。意在无人觉，灯影瘦罗襟。风致独云好，深宵余抚琴。”似律诗而非律诗，盖因其笔力不足而不能合律也。吾读之而叹曰：“有此一诗，足以辱龚家之诗名矣。且龚姓诗人惟定庵著名，闻定庵有子号半伦。噫！吾孤陋寡闻，终不知半伦有后于海岛乎！”

文怀沙先生尝曰：“‘僧敲月下门’有‘蝉噪林逾静’之妙，‘敲’诚胜于‘推’也。”吾闻而笑曰：“韩退之岂能诗哉？‘僧敲月下门’，此鲁智深醉打山门耶！”

文者，加于质也。不骈之句、无韵之篇，语录耳、笔记耳，岂可谓之文哉？昔韩退之不工骈体，遂倡散文以败之；胡适之不善文言，遂倡白话以替之。适之犹可恕，而退之则枉为儒者矣！

昔陈寅恪有句曰：“自由共道文人笔，最是文人不自由”，虽云讽世，亦见其腐儒之态、遗少之心。或曰：此人以工匠、农人、士卒、贩夫皆为无知之犬马，故有此言。噫！吾不知五星旗下，何以容之哉！

吾初上网时，嘘堂已成名于论坛，为天涯诗词比兴版主，故乡实验体领袖。一日，读其五律，有句云：“漠漠蓝天色，峨峨碧玉林。象征之理想，暴死于人民。”乃惊曰：“出韵矣！三平尾矣！出律矣！”闻者笑曰：“竖子岂知古韵？独不闻一三五不论乎？”后某人作《网络诗坛点将录》，点吾曰：“赵缺作诗初无格律。”

古人居丧而言不文，故不能作诗以抒哀思。今之实验体诗人响马祖母病逝，乃有诗曰：“肮脏白病房，刺鼻药水味。体臭暗透露，忽焉生死会。扶床如抬棺，渴口兼渴睡。庄缶能无击，不然谋一醉。”其恬然之态，古今罕见。昔唐之县令见女子溺死江上，乃作“鸟窥眉上翠，鱼弄口旁朱”。夫县令所咏者，他人之女也；响马所咏者，自家之亲也。或以为此县令殊无人性，吾不知更以何词攻乎响马矣。

今世有学西昆体者，只求词工，不求意达，自以为得小李之道。吾尝哂之曰：“如是，则‘沧海月寒珠有露，蓝田日暖玉无烟’矣！”

或谓吾曰：“饱学者作诗，往往多用典故。”曰：“千金之子，终不以满口金牙骄人。”

益州诗人吴明贵女友病故，倩吾作诗以祭。吾曰：

“诗贵情真。吾与汝友素不相识，若妄作文章以哭之，虽工，亦不敬。”

河间诗友魏新河每哂粤人高凉不善北音，言如鸟语。一日，新河问吾曰：“《诗》之‘景行行止’，念以古音，是何声韵？”吾试念之。彼闻而大笑曰：“宛若高凉之音也，此后岂敢复讥之哉！”

汨罗周叟素不能诗，然早岁尝拜于名家门下，是以奔走京城，于诗坛亦得一席之地。叟末年颇好讲学，而无学术可以传人，惟高坐、闲谈以求名利耳。每云“我先师张某某如何如何”，“我先师夏某某如何

如何”。诸生或敬之、或恶之。吾友魏新河尝拟其态以为戏谑，乃曰：“我先祖魏忠贤如何如何。”闻者大笑。吾独叹之曰：“此《离骚》之遗韵也！‘帝高阳之苗裔兮，朕皇考曰伯庸’，其实亦不过如此。”

南通范叟不知古韵，每于荧屏以今声吟咏《离骚》，且曰：“此我祖上所传之雅音也。”或问其祖上者谁，乃曰：“范仲淹。”呜呼！文正公泉下有知，复赧颜矣！昔狄将军不祖梁公，明高帝不宗朱子，惟范文程自称文正之后。噫！今之范叟亦文程一脉乎？

今之诗人每欲采万里之风，而不察四周之事。兰州名士韩元茗客寓燕京，尝从吾学新国风，遂有诗哀乡间老妪之苦、刺山西巨贾之奢。一夕，吾问之曰：“能为汝之御者小苏作诗一篇否？”乃沉思彻夜，终不能成篇。

藏头者，诗家之小术耳，吾早年每作之以戏人。尝有五律一篇，前四句藏某君之别号，后四句曰：“是后别离久，个中滋味凄。白霜多入鬓，痴梦渐沉迷。”初甚得意，后自觉轻薄无聊，遂删之。

回文者，诗家之杂技耳。昔苏若兰作回文璇玑图，以八百余字纵横交错，颠倒反复，成诗数千。然一一读之，终无佳句。

打油者，诙谐之作、无律之篇耳。唐宋诗词虽浅白如杜少陵之“老翁逾墙走，老妇出门看”，俚俗似辛稼轩之“觑著这般火色，告妈妈将息”，亦无人谓之打油也。

纳兰性德小有文才，其所作词章往往有句无篇，可粗读而不堪细品。如“人生若只如初见，何事秋风悲画扇。等闲变却故人心，却说故人心易变”，其一、三、四句皆直抒其情、直陈其事，惟次句独作譬喻，以致气脉不畅，有失天然。盖因其才气不足而不能一气呵成也。

佛家有大乘，有小乘。大乘者，济世渡人也，小乘者，独善其身也。大小乘外，有野狐禅者，妄谈佛法也。诗家惟抒情，亦有大乘，有小乘。大乘者，抒家国天下之情也，小乘者，抒一己儿女之情也。大乘小乘，果位不同，俱为正道。至于泥古、崇洋——取皮毛而守旧、断根本而革新者，皆野狐禅也。

昔者陈帅作《梅岭三章》，有句曰：“此头须向国门悬”，此汪兆铭之旧句也。至于今日，知汪诗者无几，诵陈诗者千万。噫！此中有真意，欲辨已忘言。

今人作诗往往截词换字，以合字数、平仄。如此者既多，彼此乃不以为病。碰壁斋主语多生造，每以“忙莺”“古蟋”之类入诗，犹成名于网络。吾友马韧善情诗，有时亦难免此弊，尝以“一朵红玫”赠妻。吾读之而叹曰：“昔北宋宗室有句云‘抛馒接建章’，宋哲宗见之大笑，乃忘头痛。若哲宗生于今世，登网阅诗，当百病全消，千秋万岁。”

空林子尝问吾曰：“《沁园春·雪》佳否？”曰：“圣主责在治平，何须文采？且唐太宗文笔颇佳。‘秦皇汉武，略输文采；唐宗宋祖，稍逊风骚’，难免书生之气，不类英雄之语，加有合掌之病。”复问曰：“能改之否？”曰：“秦皇汉武，不施仁义；唐宗宋祖，太逞英豪。”

曾少立网名李子，客寓京师，好以“新诗”笔法填词，令人耳目一新。吾尝赞之曰：“所谓创新真绝世，紫砂壶泡黑咖啡。”复戏作《清平乐》以效之曰：“苍山沃土，裂变轮回路。一夜呢喃成战鼓，星火草裙飞舞。◎光阴扭转蛇身，水流掩饰伤痕。传说桃花人面，终于烂漫之春。”论者或以为尤胜原作，或以为只得形似。

今人读仓央嘉措诗集，皆爱其“世间安得双全法，不负如来不负卿”。然此等佳句，岂不谙汉语之藏人所能作哉？故曰：“诗不可译，译之，则为译者之诗矣。”

今人作律诗、绝句，往往力避重字，然有重复处，则以同义字代之。故一诗中“我”“吾”相对，“谁”“孰”并存。吾作诗，宁重字，断不如此。

有网名牛牛者名己诗集曰《食草集》，取义牛食草也。吾闻而笑之曰：“何如《插花集》雅致？”此虽戏谑，亦见诗家手段。

作拟古诗如镀金于锈铁，虽光芒闪烁，然有形无质，日久，必失色。作新国风如淘金于黄沙，无大手段，所得者，沙也，犹不及拟古。某初学者强效新国风。吾作诗诫之曰：“与其刻意探佳境，不若平心修小乘。”

生活如金矿，诗人须善采金，更须善炼金。

诗人必多情，然不必多表情。所谓“不须哭给别人看，却要别人陪我哭”。

某人稍知格律，即广收弟子，以求虚名。吾甚轻之。彼徒弟乃谓吾曰：“吾师素重先生，先生必不知也。不然，何以轻之？”是言可笑。吾轻之，是轻其诗词、品行也，彼轻我、重我，能变之乎？今之诗人，多交相毁誉，或重之，亦重之，或轻之，亦轻之，是何风气哉！昔王导以私憾坐视周顗之死，后知顗尝上表救己，乃流涕曰：“我虽不杀伯仁，伯仁由我而死。幽冥之中，负此良友。”是有私心而无公义也。吾读史至此，常罢卷而叹曰：“江左夷吾，器小如斯，晋事可知矣！”

中国人素重男轻女，而有“侠女文化”“才女文化”。其实侠女拳棒，多不如寻常侠士，才女诗词，亦多不如寻常才子。士子谀之、奉之，非敬之也，是藉之意淫耳。

君子不党，诗人亦当如是。李德裕为中晚唐第一相才，有平定藩镇之大功，惟因朋党之争，遂不能媲美郭汾阳、裴晋公，但与牛僧孺齐名，使今之读史者谓之牛李。吾每轻当代名家，是轻其诗文耳，非关恩怨。若其能有佳作，虽刺我、毁我，我亦美之也。

吾十五岁后稍知格律，耽于吟咏，三十岁前常挥霍才情，轻易成诗，或一日作七律八首，犹乐而不倦。然随时审阅、逐日删除，至于今日，所存者惟三百篇耳。某诗友读我诗集，问曰：“君之‘再无名士堪青眼，惟有先生是白眉’，‘衰鬓何人犹掷果，知心惟汝莫还珠’，‘小诗或许压新手，大奖从来归老头’，‘万重山变春秋史，一带水分南北朝’……皆佳句也，缘何一一弃之哉？”曰：“二尺珊瑚，王恺宝之，石崇碎之。”俄尔，复曰：“有句无篇，固非佳作。”

古之苦学者，未必可敬。苏秦刺股，匡衡凿壁，皆千古之美谈也。然苏秦怀私欲而玩六国，一奸贼耳；匡衡畏石显而疾陈汤，一庸奴耳。以学为苦，强学之，必求之售，售之则忘形，不售则怨。吾以作诗为乐，亦求之售，不售，且乐之。某君尝谓吾曰：“近日学诗，更学《公羊》，甚苦。”曰：“苦之则勿学。”

或曰：“诗人当淡泊宁静，不屑功名。”是何言哉！唐之李杜、宋之苏辛，孰无好名之心、建功之志耶？晋陶渊明不为五斗米折腰，然其所弃者，五斗之数耳，非米也！若加之二千石，当蹈迹士行，为南朝名臣矣。子曰：“富而可求也，虽执鞭之士，吾亦为之。如不可求，从吾所好。”呜呼！圣人遗训，岂敢忘之？

中州诗友王雨剑尝曰：“今人多不好读书而耽于网络，潜心于诗者无几矣。”吾闻而笑曰：“短信、微博、微信、陌陌，皆宜于小诗之传播，然则诗词复兴，或可待也。”

胶东商人徐大伟尝谓吾曰：“我日读一书，犹恨少也。”吾曰：“我读《诗》三载，犹恐不能通之。君之所读是何物哉？韩氏之杂谈乎？”

郭氏之小说乎？安氏之散文乎？如此者虽读千万，亦无学问。”

白瓷之器，新则非旧；塑料之器，旧则非新。黄酒绿茶，依然适口；咖啡可乐，或者伤身。近人贬中国诗词为旧诗，称西方学术为新学，岂不谬哉？

吾昔日每云：“新诗非诗，恐龙非龙。圣诞非圣，公元非公。”此早岁愤激之言也，然今日思之，亦非无理。